



白氏文集卷第五

閒適一

古調詩凡五十三首

常樂里閒居偶題十六韻兼寄劉十五公輿

王十一起呂二吳呂四頰崔十八玄亮元

九積劉三十二敦質張十五仲元時為校

書郎

帝都名利場雞鳴無安居獨有懶慢者日高頭未梳
工拙性不同進退迹遂殊幸逢太平代天子好文儒
小才難大用典校在秘書三旬兩入省因得養頑踈
茅屋四五間一馬二僕夫俸錢萬六千月給亦有餘
既無衣食牽亦少人事拘遂使少年心日日常晏如
勿言無知己躁靜各有徒蘭臺七八人出處與之俱

旬時阻談笑旦夕望軒車誰能讎校間解帶卧吾廬
窓前有竹翫門外有酒沽何以待君子數竿對一壺

答元八宗簡同遊曲江後明日見贈

長安千萬人出門各有營唯我與夫子信馬悠悠行
行到曲江頭反照草樹明南山好顏色病客有心情
水禽翻白羽風荷嫋翠莖何必滄浪去卽此可濯纓
時景不重來賞心難再并坐愁紅塵裏夕鼓鼙聲
歸來經一宿世慮稍復生賴聞瑤華唱再得塵襟清

感時

朝見日上天暮見日入地不覺明鏡中忽年三十四
勿言身未老冉冉行將至白髮雖未生朱顏已先悴
人生詎幾何在世猶如寄雖有七十期十人無一二
今我猶未悟往往不適意胡爲方寸間不貯浩然氣
貧賤非不惡道在何足避富貴非不愛時來當自致
所以達人心外物不能累唯當飲美酒終日陶陶醉
斯言勝金玉佩之無失墜

首夏同諸校正遊開元觀因宿翫月

我與二三子策名在京師官小無職事間於爲客時
沉沉道觀中心賞期在茲到門車馬迴入院巾杖隨
清和四月初樹木正華滋風清寒葉影鳥戀殘花枝
向夕天又晴東南餘霞披置酒西廊下待月盃行遲
須臾金魄生若與吾徒期光華一照耀殿角相參差
終夜清景前笑歌不知疲長安名利地此興幾人知

永崇里觀居

季夏中氣候煩暑自此收蕭颯風雨天蟬聲暮啾啾
永崇里巷靜華陽觀院幽軒車不到處滿地槐花秋
年光忽冉冉世事本悠悠何必待衰老然後悟浮休
真隱豈長遠至道在冥搜身雖世界住心與虛無遊
朝饑有蔬食夜寒有布裘幸免凍與餒此外復何求
寡慾雖少病樂天心不憂何以明吾志周易在床頭

早送舉人入試

夙駕送舉人東方猶未明自謂出太早已有車馬行
騎火高低影街鼓參差聲可憐早朝者相看意氣生
日出塵埃飛群動互營營營各何求無非利與名
而我常晏起虛任長安城春深官又滿日有歸山情

招王質夫

自此後詩爲
盤屋對時作

濯足雲水客折腰簪笏身
誼閒跡相背十里別經行
忽因乘逸興莫惜訪囂塵
窓前故栽竹與君爲主人
祇役駱口因與王質夫同遊秋山偶題三韻
石擁百泉合雲破千峯開
平生烟霞侶此地重徘徊
今日勤王意一半爲山來

見蕭侍御憶舊山草堂詩因和以寄

琢玉以爲架綴珠以爲籠
玉架絆野鶴珠籠鎖冥鴻
鴻思雲外天鶴憶松上風
珠玉信爲美鳥不戀其中
臺中蕭侍御心與鴻鶴同
晚起慵冠豸間行馱避駘
昨見憶山詩詩思浩無窮
歸夢杳何處舊居茫水東
秋閒杉桂林春老芝朮叢
自云別山後離抱常忡忡
衣繡非不榮持憲非不雄
所樂不在此悵望莫當空

病假中南亭閒望

欹枕不視事兩日門掩關始知吏役身不病不得閒
閒意不在遠小亭方丈間西簷竹梢上坐見太白山
遙愧峯上雲對此塵中顏

仙遊寺獨宿

沙鶴上堦立潭月當戶開此中留我宿兩夜不能迴
幸與靜境遇喜無歸侶催從今獨遊後不擬共人來

前亭涼夜

露簾色似玉風幌影如波坐愁樹葉落中庭明月多

官舍小亭閒望

風竹散清韻烟槐凝綠姿日高人吏去閒坐在茅茨
葛衣禦時暑蔬飯療朝飢持此聊自足心力少營為

亭上獨吟罷眼前無事時數峯太白雪一卷陶潛

人心各自是我是良在茲迴謝爭名客甘從君所嗤

早秋獨夜

井梧涼葉動隣杵秋聲發獨向簷下眠覺來半床月

德彈古淥水

琴曲名

聞君古淥水使我心和平欲識慢流意為聽踈汎聲
西窓竹陰下竟日有餘清

松齋自題

時為翰林學士

非老亦非少年過三紀餘非賤亦非貴朝登一命初
才小分易足心寬體長舒充腸皆美食容膝即安居
况此松齋下一琴數帙書書不求甚解琴聊以自娛
夜直入君門晚歸卧吾廬形骸委順動方寸空虛

持此將過日自然多晏如昏昏復默默非智亦非愚
冬夜與錢員外同直禁中

夜深草詔罷霜月凄凜凜欲卧暖殘盃燈前相對飲
連鋪青練被對置通中枕髣髴百餘宵與君同此寢
和錢員外禁中夙興見示

窓白星漢曙窓暖燈火餘坐卷朱裏幕看封紫泥書
宵宵鍾漏盡瞳瞳霞景初樓臺紅照耀松竹青扶踈
君愛此時好回頭特謂余不知上清界曉景復何如

夏日獨直寄蕭侍御

憲臺文法地翰林清切司鷹猜課野鶴驥德責山麋
課責雖不同同歸非所宜是以方寸內忽忽暗相思
夏日獨上直日長何所爲澹然無他念虛靜是吾師

形委有事牽心與無事期中臆一以曠外累都若遺
地貴身不覺意閒境來隨但對松與竹如在山中時
情性聊自適吟詠偶成詩此意非夫子餘人多不知

松聲

修竹里張家宅南亭作

月好好獨坐雙松在前軒西南微風來潛入枝葉間
蕭寥發爲聲半夜明月前寒山颯颯雨秋琴泠泠絃
一聞滌炎暑再聽破昏煩竟夕遂不寐心體俱翛然
南陌車馬動西鄰歌吹繁誰知茲簷下滿耳不爲喧

禁中

門嚴九重靜窓幽一室閒好是修心處何必在深山

贈吳丹

巧者力苦勞智者心苦憂愛君無巧智終歲閒悠悠

嘗登御史府亦佐東諸侯手操糺謬簡心運決勝籌
宦途似風水君心如虛舟汎然而不有進退得自由
今來脫豸冠時往侍龍樓官曹稱心靜居處隨跡幽
冬負南簷日支體甚溫柔夏卧北窓風枕席如涼秋
南山入舍下酒甕在床頭人間有閒地何必隱林丘
顧我愚且昧勞生殊未休一入金門直星霜三四周
主恩信難報近地徒久留終當乞閒官退與夫子遊
初除戶曹喜而言志

詔授戶曹掾捧詔感君恩感恩非爲已祿養及吾親
弟兄俱簪笏新婦儼衣巾羅列高堂下拜慶正紛紛
俸錢四五萬月可奉晨昏廩祿二百石歲可盈倉困
喧喧車馬來賀客滿我門不以我爲貪知我家內貧

置酒延賀客客容亦歡欣笑云今日後不復憂空樽
答云如君言願君少逡巡我有平生志醉後爲君陳
人生百歲期七十有幾人浮榮及虛位皆是身之賓
唯有衣與食此事粗關身苟免飢寒外餘物盡浮雲

秋居書懷

門前少賓客塔下多松竹秋景下西墻涼風入東屋
有琴慵不弄有書閒不讀盡日方寸中澹然無所欲
何須廣居處不用多積蓄文室可容身斗儲可充腹
况無治道術坐受官家祿不種一株桑不鋤一隴穀
終朝飽飯食卒歲豐衣服持此知愧心自然易爲足

禁中曉臥因懷王起居

遲遲禁漏盡悄悄冥鷄喧夜雨槐花落微涼臥北軒

曙燈殘未滅風簾閒自翻每得一靜境思與故人言

養拙

鐵柔不爲劍木曲不爲轅今我亦如此愚蒙不及門
甘心謝名利滅跡歸丘園坐卧茅茨中但對琴與樽
身去韁鑿累耳辭朝市喧逍遙無所爲時窺五千言
無憂樂性場寡慾清心源始知不才者可以探道根

寄李十一建

外事牽我形外物誘我情李君別來久褊恡從中生
憶昨訪君時立馬扣柴荆有時君未起稚子喜先迎
連步笑出門衣翻冠或傾掃堦苔紋綠拂榻藤陰清
家醞及春熟園葵乘露烹看山東亭坐待月南原行
門靜唯鳥語坊遠少鼓聲相對盡日言不及利與名
分手來幾時明月三四盈別時殘花落及此新蟬鳴
芳歲忽已晚離抱悵未平豈不思命駕吏職坐相縈
前時君有期訪我來山城心賞久云阻言約無自輕
相去幸非遠走馬一日程

旅次華州贈袁右丞

渭水綠溶溶華山青崇崇山水一何麗君子在其中
才與世會合物隨誠感通德星降人福時雨助歲功
化行人無訟囹圄千日空政順氣亦和黍稷三年豐
客自帝城來驅馬出關東愛此一郡人如見太古風
方今天子心憂人正忡忡安得天下守盡得如袁公

酬楊九弘貞長安病中見寄

伏枕君寂寂折腰我營營所嗟經時別相去一宿程

携手昨何時昆明春水平離郡來幾日太白夏雲生
之子未得意貧病客帝城貧堅志士節病長高人情
隱几自恬淡閉門無送迎龍卧心有待鶴瘦貌彌清
清機發爲文投我如振瓊何以慰飢渴捧之吟一聲

禁中偶直夢遊仙遊寺

西軒草詔暇松竹深寂寂月出清風來忽是山中夕
因成西南夢夢作遊仙客覺聞宮漏聲猶謂山泉滴
贈王山人

聞君減寢食日聽神仙說暗待非常人潛求長生訣
言長本對短未離生死轍假使得長生才能勝天折
松樹千年朽槿花一日歇畢竟共虛空何須誇歲月
彭生徒自異生死終無別不如學無生無生卽無滅

秋山

久病曠心賞今朝一登山山秋雲物冷稱我清羸顏
白石卧可枕青蘿行可攀意中如有得盡日不欲還
人生無幾何如寄天地間心有千載憂身無一日閒
何時解塵網此地來掩關

贈能七倫

澗松高百尋四時寒森森臨風有清韻向日無曲陰
如何時俗人但賞桃李林豈不知堅貞芳馨誘其心
能生學爲文氣高功亦深手中一百篇句句披沙金
苦節二十年無人振陸沉今我尚貧賤徒爲爾知音

題楊隱士西亭

靜得亭上境遠諧塵外蹤憑軒東南望鳥滅山重重

竹露冷煩襟杉風清病容曠然宜貞趣道與心相逢
即此可遺世何必蓬壺峯

題贈鄭秘書徵君石溝溪隱居

鄭生常隱天台徵起而仕

今復謝病
隱於此

鄭君得自然虛白生心胃吸彼沆瀣精疑爲冰雪容
大君貞元初求賢致時雍蒲輪入翠微迎下天台峯
赤城別松喬黃閣交夔龍俛仰受三命從容辭九重
出籠鶴翩翩歸林鳳嗷嗷在火辨良玉經霜識貞松
新居寄楚山山碧溪溶溶丹竈燒烟煜黃精花丰茸
蕙帳夜瑟淡桂樽春酒濃時人不到處蒼石無塵蹤
我今何爲者趨世身龍鍾不向林壑訪無由朝市逢
終當解塵纓卜築來相從

及第後歸觀留別諸同年

十年常苦學一上謬成名擢第未爲貴賀親方始榮
時輩六七人送我出帝城軒車動行色絲管舉離聲
得意減別恨半酣輕遠程翩翩馬蹄疾春日歸鄉情

清夜琴興

月出鳥栖盡寂然坐空林是時心境閒可以彈素琴
清泠由木性恬淡隨人心心積和平氣木應正始音
響餘群動息曲罷秋夜深正聲感元化天地清沉沉

效陶潛體詩十六首

并序

余退居渭上杜門不出時屬多雨無以自娛會家醜
新熟雨中獨飲往往酣醉終日不醒懶放之心彌覺
自得故得於此而有以忘於彼者因詠陶淵明適興

意會遂徼其體成十六篇醉中狂言醒輒自哂然知我者亦無隱焉

不動者厚地不息者高天無窮者日月長在者山川松柏與龜鶴其壽皆千年嗟嗟群物中而人獨不然早出向朝市暮已歸下泉形質及壽命危脆若浮烟堯舜與周孔古來稱聖賢借問今何在一去亦不還我無不死藥萬萬隨化遷所未定知者脩短遲速間幸及身健日當歌一樽前何必待人勸持此自爲歡

二

翳翳踰月陰沉沉連日雨開簾望天色黃雲暗如土行潦毀我墉疾風壞我宇蓬莠生庭院泥塗失場圃村深絕賓客窓晦無儔侶盡日不下床跳鼃時入戶

出門無所往入室還獨處不以酒自娛塊然與誰言

三

朝飲一盃酒冥心合元化兀然無所思日高尚間卧暮讀一卷書會意如嘉話欣然有所遇夜深猶獨坐又得琴上趣安絃有餘暇復多詩中狂下筆不能罷唯茲三四事特用度晝夜所以陰雨中經旬不出舍始悟獨住人心安時亦過

四

東家采桑婦雨來苦愁悲蒺藜北堂前雨冷不成絲西家荷鋤叟雨來亦怨咨種豆南山下雨多落爲箕而我獨何幸醞酒本無期及此多雨日正遇新熟時開瓶瀉樽中玉液黃金脂持翫已可悅歡嘗有餘滋

一酌發好容再酌開愁眉速進四五酌酣暢入四肢
忽然遺我物誰復分是非是時連夕雨醅酹無所知
人心苦顛倒反爲憂者嗤

五

朝亦獨醉歌暮亦獨醉睡未盡一壺酒已成三獨醉
勿言飲太少且喜歡易致一盃復兩盃多不過三四
便得心中適盡忘身外事更復強一盃陶然遺萬累
一飲一石者徒以多爲貴及其醅酹時與我亦無異
笑謝多飲者酒錢徒自費

六

天秋無片雲地靜無纖塵團團新晴月林下生白輪
憶昨陰霖天連連三四旬賴逢家醞熟不覺過朝昏
私言雨霽後可以罷餘樽及對新月色不醉亦愁人
床頭殘酒榼欲盡味彌淳携置南簷下舉酌自殷勤
清光入盃杓白露生衣巾乃知陰與晴安可無此君
我有樂府詩成來人未聞今宵醉有興狂詠驚四鄰
獨賞猶復爾何況有交親

七

中秋三五夜明月在前軒臨觴忽不飲憶我平生歡
我有同心人邈邈崔與錢我有忘形友迢迢李與元
或飛青雲上或落江湖間與我不相見于今三四年
我無縮地術君非馭風仙安得明月下四人來晤言
良夜信難得佳期杳無緣明月又不住漸下西南天
豈無他時會惜此清景前

八
家醞飲已盡村中無酒沽坐愁今夜醒其奈秋懷何
有客忽叩門言語一何佳云是南村叟挈榼來相過
且喜樽不燥安問少與多重陽雖已過籬菊有殘花
歡來苦晝短不覺夕陽斜老人勿遽起且待新月華
客去有餘趣竟夕獨酣歌

九

原生衣百結顏子食一簞歡然樂其志有以忘飢寒
今我何人哉德不比先賢衣食幸相屬胡為不自安
况茲清渭曲居處安且閒榆柳百餘樹茅茨數十間
寒負簷下日熱濯澗底泉日出猶未起日入已復眠
西風滿村巷清涼八月天但有雞犬聲不聞車馬喧
時傾一樽酒坐望東南山稚姪初學步牽衣戲我前
即此自可樂庶幾顏與原

十

湛湛樽中酒有功不自伐不伐人不知我今待其說
良將臨大敵前驅千萬卒一簞投河飲赴死心如一
壯士磨七首勇憤氣咆嘯一酣忘報讐四體如無骨
東海殺孝婦天旱踰年月一酌酹其魂通宵雨不歇
咸陽秦獄氣冤痛結為物千歲不肯散一沃亦銷失
况茲兒女恨及彼幽憂疾快飲無不消如霜得春日
方知趨孽靈萬物無與定

十一

烟霞隔玄圃風波限瀛洲我豈不欲往大海路阻脩

神仙但聞說靈藥不可求長生無得者舉世如蜉蝣
逝者不重廻存者難久留踟躕未死間何苦懷百憂
念此忽肉熱坐看成白頭舉盃還獨飲顧影自獻酬
心與口相約未醉勿言休今朝不盡醉知有明朝不
不見郭門外纍纍墳與丘明月愁殺人黃蒿風颼颼
死者若有知悔不秉燭遊

十二

吾聞潯陽郡昔有陶徵君愛酒不愛名憂醒不憂貧
嘗爲彭澤令在官纔八旬愀然忽不樂掛印著公門
口吟歸去來頭戴漉酒巾人吏留不得直入故山雲
歸來五柳下還以酒養真人間榮與利擺落如泥塵
先生去已久紙墨有遺文篇篇勸我飲此外無所云
我從老大來竊慕其爲人其他不可及且儻醉昏昏

十三

楚王疑忠臣江南放屈平晉朝輕高士林下棄劉伶
一人常獨醉一人常獨醒醒者多苦志醉者多歡情
歡情信獨善苦志竟何成兀傲甕間卧憔悴澤畔行
彼憂而此樂道理甚分明願君且飲酒勿思身後名

十四

有一燕趙士言貌甚竒瓌日日酒家去脫衣典數盃
問君何落魄云僕生草萊地寒命且薄徒抱王佐才
豈無濟時策君門乏良媒三獻寢不報遲遲空手廻
亦有同門生先升青雲梯貴賤交道絕朱門叩不開
及歸種禾黍三歲旱爲灾入山燒黃白一旦化爲灰

蹉跎五十餘生世苦不借處處去不得却歸酒中來

十五

南巷有貴人高蓋駟馬車我問何所苦四十垂白鬚
荅云君不知位重多憂虞北里有寒士甕牖繩爲樞
出扶桑梨杖入卧蝸牛廬散賤無憂患心安體亦舒
東鄰有富翁藏貨徧五都東京收粟帛西市鬻金珠
朝營暮計筭晝夜不安居西舍有貧者匹婦配匹夫
布裙行賃舂短褐坐傭書以此求口食一飽欣有餘
貴賤與貧富高下雖有殊憂樂與利害彼此不相踰
是以達人觀萬化同一途但未知生死勝負兩何如
遲疑未知間且以酒爲娛

十六

濟水澄而絜河水渾而黃交流列四瀆清濁不相傷
太公戰牧野伯夷餓首陽同時號賢聖進退不相妨
謂天不愛民胡爲生稻梁謂天果愛民胡爲生豺狼
謂神福善人孔聖竟栖遑謂神禍淫人暴秦終霸王
顏回與黃憲何辜早夭亡蝮蛇與鳩鳥何得壽延長
物理不可測神道亦難量舉頭仰問天天色但蒼蒼
唯當多種黍日醉手中觴

白氏文集卷第五

白氏文集卷第六

閒適二

凡古調詩五言
凡四十一首

自題寫真

時為翰林學士

我貌不自識李放寫我真靜觀神與骨合是山中人
蒲柳質易朽麋鹿心難馴何事赤墀上五年為侍臣
况多剛狷性難與世同塵不惟非貴相但恐生禍因
宜當早罷去收取雲泉身

遣懷

自此後詩
在渭村作

寓心身體中寓性方寸內此身是外物何足苦憂愛
况有假飾者華簪及高蓋此又踈於身復在外物外
操之多惴慄失之又悲悔乃知名與利得喪俱為害
頽然環堵客蘿蕙為巾帶自得此道來身窮心甚泰

渭上偶釣

渭水如鏡色中有鯉與魴偶持一竿竹懸釣在其傍
微風吹釣絲嫋嫋十尺長身雖對魚坐心在無何鄉
昔有白頭人亦釣此渭陽釣人不釣魚七十得文王
况我垂釣意人魚亦兼亡無機兩不得但弄秋水光
興盡釣亦罷歸來飲我觴

隱几

身適忘四支心適忘是非既適又忘適不知吾是誰
百體如槁木兀然無所知方寸如死灰寂然無所思
今日復明日身心忽兩遺行年三十九歲暮日斜時
四十心不動吾今其庶幾

春眠

新浴肢體暢獨寢神魄安况因夜深坐遂成日高眠
春被薄亦暖朝窓深更閒却忘人間事似得枕上仙
至適無夢想大和難名言全勝彭澤醉欲敵曹溪禪
何物呼我覺伯勞聲關關起來妻子笑生計春茫然

閒居

空腹一盞粥飢食有餘味南簷半床日暖臥因成睡
綿袍擁兩膝竹几支雙臂從旦直至昏身心一無事
心足卽爲富身閒乃當貴富貴在此中何必居高位
君看裴相國金紫光照地心苦頭盡白纔年四十四
乃知高蓋車乘者多憂畏

夏日

東窓曉無熱北戶涼有風盡日坐復卧不離一室中

中心本無繫亦與出門同

適意二首

十年為旅客常有飢寒愁三年作諫官復多尸素羞
有酒不暇飲有山不得遊豈無平生志拘牽不自由
一朝歸渭上泛如不繫舟置心世事外無喜亦無憂
終日一蔬食終年一布裘寒來彌懶放數日一梳頭
朝睡足始起夜酌醉即休人心不過適適外復何求

二

早歲從旅遊頗諳時俗意中年忝班列備見朝廷事
作客誠已難為臣猶不易况予方且介舉動多忤累
直道速我尤詭遇非吾志胷中十年內消盡浩然氣
自從反田畝頓覺無憂愧蟠木用難施浮雲心易遂
悠悠身與世從此兩相棄

首夏病間

我生來幾時萬有四千日自省於其間非憂即有疾
老去慮漸息年來病初愈忽喜身與心泰然兩無苦
况茲孟夏月清和好時節微風吹袂衣不寒復不熱
移榻樹陰下竟日何所為或飲一甌茗或吟兩句詩
內無憂患迫外無職役羈此日不自適何時是適時

晚春沽酒

百花落如雪兩鬢垂作絲春去有來日我老無少時
人生待富貴為樂常苦遲不如貧賤日隨分開愁眉
賣我所乘馬典我舊朝衣盡將沽酒飲酪酏步行歸
名姓日隱晦形骸日變衰醉卧黃公肆人知我是誰

蘭若寓居

名宦老慵求退身安草野家園病懶歸寄居在蘭若
薜衣換簪組黎杖代車馬行止輒自由甚覺身瀟灑
晨遊南塢上夜息東菴下人間千萬事無有關心者

麴生訪宿

西齋寂已暮叩門聲榻榻知是君宿來自拂塵埃席
村家何所有茶果迎來客貧靜似僧居竹林依四壁
厨燈斜影出簷雨餘聲滴不是愛閒人肯來同此夕
聞庾七左降因詠所懷

我病居渭北君老謫巴東相悲一長嘆薄命與君同
既嘆還自哂哂嘆兩未終後心誚前意所見何迷蒙
人生大塊間如鴻毛在風或飄青雲上或落泥塗中
袞服相天下儻來非我通布衣委草莽偶去非吾窮
外物不可必中懷須自空無令怏怏氣留滯在心曾

答卜者

病眼昏似夜衰髮颯如秋除却須衣食平生百事休
知君善易者問我決疑不卜非他故人間無所求

歸田三首

人生何所欲所欲唯兩端中人愛富貴高士慕神仙
神仙須有藉富貴亦在天莫戀長安道莫尋方丈山
西京塵浩浩東海浪漫漫金門不可入琪樹何由攀
不如歸山下如法種春田

二

種田意已決決意復何如賣馬買犢使徒步歸田廬

迎春治耒耜候雨闢苗畬策杖田頭立躬親課僕夫
吾聞老農言爲稼慎在初所施不鹵莽所報必有餘
上求奉皇稅下望脩家儲安得放慵惰拱手而曳裾
學農未爲鄙親友勿笑余更待明年後自擬執犁鋤

三

三十爲近臣腰間鳴佩玉四十爲野夫田中學鋤穀
何言十年內變化如此速此理固是常窮通相倚伏
爲魚有深水爲鳥有高木何必守一方窘然自牽束
化吾足爲馬吾因以行陸化吾手爲彈吾因以求肉
形骸爲異物委順心猶足幸得且歸農安知不爲福
况吾行欲老瞥若風中燭孰能俄頃間將心繫榮辱

秋遊原上

七月行已半早涼天氣清清晨起巾櫛徐步出柴籬
露杖筇竹冷風襟越蕉輕閒携弟姪輩同上秋原行
新棗未全赤晚瓜有餘馨依依田家叟設此相逢迎
自我到此村往來白髮生村中相識久老幼皆有情
留連向暮歸樹樹風蟬鳴是時新雨足禾黍夾道青
見此令人飽何必待西成

九日登西原宴望

同諸兄弟作

病愛枕席涼日高眠未輟弟兄呼我起今日重陽節
起登西原望懷抱同一豁移座就菊叢醪酒前羅列
雖無絲與管歌笑隨情發白日未及傾顏酡耳已熱
酒酣四向望六合何空濶天地自久長斯人幾時活
請看原下村村人死不歇一村四十家哭葬無虛月

指此各相勉良辰且歡悅

寄同病者

三十生二毛早衰爲沉痾四十官七品拙宦非由他
面顏日枯槁時命日蹉跎豈獨我如此聖賢無奈何
回觀親舊中舉目猶可嗟或有終老者沉賤如泥沙
或有始壯者飄忽如風花窮餓與夭促不如我者多
以此反自慰常得心平和寄言同病者迴歎且爲歌

遊藍田山卜居

脫置腰下組擺落心中塵行歌望山去意似歸鄉人
朝蹋玉峯下暮尋藍水濱擬求幽僻地安置踈慵身
本性便山寺應須旁悟真

村雪夜坐

南窓背燈坐風霰暗紛紛寂寞深村夜殘鴈雪中聞

東園翫菊

少年昨已去芳歲今又闌如何寂寞意復此荒涼園
園中獨立久日淡風露寒秋蔬盡蕪沒好樹亦凋殘
唯有數叢菊新開籬落間携觴聊就酌爲爾一留連
憶我少小日易爲興所牽見酒無時節未飲心欣然
近從年長來漸覺取樂難常恐更衰老強飲亦無歡
顧謂爾菊花後時何獨鮮誠知不爲我借爾暫開顏

觀稼

世役不我牽身心常自若晚出看田畝閒行旁村落
纍纍繞場稼嘖嘖群飛雀年豐豈獨人禽鳥聲亦樂
田翁逢我喜默起其杯杓斂手笑相延社酒有殘酌

愧茲勤且敬藜杖爲淹泊言動任天真未覺農人惡
停盃問生事夫種妻兒穫筋力苦疲勞衣食常單薄
自暫祿仕者不曾營農作飽食無所勞何殊衛人鶴

聞哭者

昨日南鄰哭哭聲一何苦云是妻哭夫夫年二十五
今朝北里哭哭聲又何切云是母哭兒兒年十七八
四鄰尚如此天下多夭折乃知浮世人少得垂白髮
余今過四十念彼聊自悅從此明鏡中不嫌頭似雪

新構亭臺示諸弟姪

平臺高數尺臺上築茅茨東西疏二牖南北開兩扉
蘆簾前後卷竹簟當中施清冷白石枕疏涼黃葛衣
開衿向風坐夏日如秋時笑傲頗有趣窺臨不知疲

東窓對華山三峯碧參差南簷當渭水卧見雲帆飛
仰摘枝上果俯折畦中葵足以充飢渴何必慕甘肥
况有好群從旦夕相追隨

自吟拙什因有所懷

懶病每多暇暇來何所爲未能拋筆硯時作一篇詩
詩成淡無味多被衆人嗤上怪落聲韻下嫌拙言詞
時時自吟詠吟罷有所思蘇州及彭澤與我不同時
此外復誰愛唯有元微之謫向江陵府三年作判司
相去二千里詩成遠不知

東坡秋意寄元八

寥落野陂畔獨行思有餘秋荷病葉上白露大如珠
忽憶同賞地曲江南北隅秋池少遊客唯我與君俱

啼蛩隱紅蓼瘦馬蹋青蕪當時與今日俱是暮秋初
節物苦相似時景亦無餘唯有人分散經年不得書

閒居

深閉竹間扉靜掃松下地獨嘯晚風前何人知此意
看山盡日坐枕帙移時睡誰能從我遊使君心無事

詠拙

所稟有巧拙不可改者性所賦有厚薄不可移者命
我性拙且蠢我命薄且屯問我何以知所知良有因
亦曾舉兩足學人踏紅塵從茲知性拙不解轉如輪
亦曾奮六翮高飛到青雲從茲知命薄摧落不逡巡
慕貴而馱賤樂富而惡貧同此天地間我豈異於人
性命苟如此反則成苦辛以此自安分雖窮每欣欣

苴茅爲我廬編蓬爲我門縫布作袍被種穀充盤
靜讀古人書閒釣清渭濱優哉復遊哉聊以終吾身

詠慵

有官慵不選有田慵不農屋穿慵不葺衣裂慵不縫
有酒慵不酌無異樽長空有琴慵不彈亦與無絃同
家人告飯盡欲炊慵不舂親朋寄書至欲讀慵開封
嘗聞愁叔夜一生在慵中彈琴復鍛鍊比我未爲慵

冬夜

家貧親愛散身病交遊罷眼前無一人獨掩村齋卧
冷落燈火暗離披簾幕破策策窓戶前又聞新雪下
長年漸省睡夜半起端坐不學坐忘心寂寞安可過
兀然身寄世浩然心委化如此來四年一千三百夜

村中留李三固言宿

平生早遊宦不道無親故如我與君心相知應有數
春明門前別金氏陂中遇村酒兩三盃相留寒日暮
勿嫌村酒薄聊酌論心素請君少踟躕繫馬門前樹
明年身若健便擬江湖去他日縱相思知君無覓處
後會既茫茫今宵君且住

友人夜訪

簷間清風簟松下明月盃幽意正如此况乃故人來

遊悟貞寺詩一百三十一韻

元和九年秋八月月上弦我遊悟貞寺寺在王順山
去山四五里先聞水潺湲自茲捨車馬始步藍溪灣
手拄青竹杖足蹋白石灘漸怪耳目曠不聞人世喧

山下望山上初疑不可攀誰知中有路盤折通巖巖
一息幡竿下再休石龕邊龕間長丈餘門戶無扃關
俯窺不見人石髮垂若鬢驚出白蝙蝠雙飛如雪翻
回首寺門望青崖夾朱軒如擘山腹開置寺於其間
入門無平地地窄虛空寬房廊與臺殿高下隨峯巒
巖崿無撮土樹木多瘦堅根株抱石長屈曲蟲蛇蟠
松桂亂無行四時鬱芊芊枝梢嫋青翠韻若風中絃
日月光不透綠陰相交延幽鳥時一聲聞之似寒蟬
言憇賓位亭就坐未及安須臾開北戶萬里明豁然
拂簷虹霏微遶棟雲回旋赤日間白雨陰晴同一川
野綠簇草樹眼界吞秦原渭水細不見漢陵小於拳
却顧來時路縈紆映朱欄歷歷上山人一遙可觀

前對多寶塔風鐸鳴四端欒櫺與戶牖恰恰金碧繁
云昔伽葉佛此地坐涅槃至今鐵鉢在當底手跡穿
西開玉像殿白佛森比肩抖擻塵埃衣禮拜冰雪顏
疊霜爲袈裟貫電爲華鬘逼觀疑鬼功其跡非雕鏤
次登觀音堂未到聞旃檀上堦脫雙履歛足升瑤筵
六楹排玉鏡四座敷金鈿黑夜自光明不待燈燭燃
衆寶互低昂碧珮珊瑚幡風來似天樂相觸聲珊珊
白珠垂露凝赤珠滴血殷點綴佛髻上合爲七寶冠
雙瓶白琉璃色若秋水寒隔瓶見舍利圓轉如金丹
玉笛何代物天人施祇園吹如秋鶴聲可以降靈仙
是時秋方中三五月正圓寶堂豁三門金魄當其前
月與寶相射晶光爭鮮妍照人心骨冷竟夕不欲眠

曉尋南塔路亂竹低嬋娟林幽不逢人寒蝶飛翩翩
山果不識名離離夾道蕃足以療飢乏摘嘗味甘酸
道南藍谷神紫傘白紙錢若歲有水旱詔使修蘋蘩
以地清淨故獻奠無葷羶危石疊四五巖嵬欹且刊
造物者何意堆在巖東偏冷滑無人跡苔點如花牋
我來登上頭下臨不測淵目眩手足掉不敢低頭看
風從石下生薄人而上搏衣服似羽翻開張欲飛騫
巖巖三百峯峯尖刁劔攢悠悠白雲過决開露青天
西北日落時夕暉紅團團千里翠屏外走下丹砂丸
東南月上時夜氣清漫漫百丈碧潭底寫出黃金盤
藍水色似藍日夜長潺潺周迴繞山轉下視如青環
或鋪爲慢流或激爲奔湍弘澄最深處浮出蛟龍涎

側身入其中懸磴猶險難捫蘿踏樛木下逐飲澗爰
雪迸起白鷺錦跳驚紅鱸歇定方盥漱濯去支體煩
淺深皆洞徹可照惱與肝但愛清見底欲尋不知源
東崖饒怪石積甃蒼琅玕溫潤發於外其間韞璵璠
卞和死已久良玉多棄捐或時洩光彩夜與星月連
中頂最高峯拄天青玉竿颯颯上不得豈我能攀援
上有白蓮池紫葩覆清瀾聞名不可到處所非人寰
又有一片石大如方尺輒插在半壁上其下萬仞懸
云有過去師坐得無生禪號爲定心石長老世所傳
却上謁仙祠蔓草生綿綿昔聞王氏子羽化升上玄
其西曬藥臺猶對芝朮田時復明月夜上聞黃鶴言
迴尋畫龍堂二叟鬚髮斑想見聽法時歡喜禮印壇

復歸泉窟下化作龍蜿蜒階前石孔在欲雨生白烟
往有寫經僧身靜心精專感彼雲外鶴群飛千翩翩
來添硯中水去吸巖下泉一日三往復時節長不憊
經成號聖僧弟子名揚難誦此蓮花偈數滿百億千
身壞口不壞舌根如紅蓮顱骨今不見石函尚存焉
粉壁有吳畫筆彩依舊鮮素屏有褚書墨色如新乾
名境與異跡周覽無不殫一遊五晝夜欲返仍盤桓
我本山中人誤爲時網牽牽率使讀書推挽令劬官
旣登文字科又忝諫諍真倔直不合時無益同素餐
以此自慙惕戚戚常寡歡無成心力盡未老形骸殘
今來脫簪組始覺離憂患及爲山水遊彌得縱踈頑
野麋斷羈絆行走無拘攣池魚放入海一往何時還

身著居士衣手把南華篇終來此山住永謝區中緣
我今四十餘從此終身閒若以七十期猶得三十年

酬張十八訪宿見贈

昔我爲近臣君常稀到門今我官職冷唯君來往頻
我受狷介性立爲頑拙身平生雖寡合合卽無緇磷
况君秉高義富貴視如雲五侯三相家眼冷不見君
問其所與游獨言韓舍人其次卽及我我愧非其倫
胡爲謬相愛歲晚逾勤勤落然頽簷下一話夜達晨
床單食味薄亦不嫌我貧日高上馬去相顧猶逡巡
長安久無雨日赤風昏昏憐君將病眼爲我犯埃塵
遠從延康里來訪曲江濱所重君子道不獨愧相親

朝歸書寄元八

進入閣前拜退就廊下食歸來昭國里人卧馬歇鞍
却睡至日午起坐心浩然况當好時節雨後清和天
柿樹綠陰合王家庭院寬瓶中鄠縣酒牆上終南山
獨眠仍獨坐開襟當風前禪僧與詩客次第來相看
要語連夜語須眠終日眠除非奉朝謁此外無別牽
年長身且健官貧心甚安幸無急病痛不至苦饑寒
自此聊以適外緣不能干唯爲靜者信難爲動者言
臺中元侍御早晚作郎官未作郎官際無人相伴閒

酬吳七見寄

曲江有病者尋常多掩關又聞馬死來不出身更聞
聞有送書者自起出門看素緘署丹字中有瓊瑤篇
口吟耳自聽當暑忽倏然似漱寒玉水如聞商風絃

首章嘆時節末句思笑言懶慢不相訪隔街如隔山
常聞陶潛語心遠地自偏君住安邑里左右車徒喧
竹藥閉深院琴樽開小軒誰知市南地轉作壺中天
君本上清人名在石堂間不知有何過謫作人間仙
常恐歲月滿飄然歸紫烟莫忘蟬蛸內進士有同年

昭國閒居

貧閒日高起門巷晝寂寂時暑放朝叅天陰少人客
槐花滿田地僅絕人行跡獨在一床眠清涼風雨夕
勿嫌坊曲遠近即多牽役勿嫌祿俸薄厚即多憂責
平生尚恬曠老大宜安適何以養吾真官閒居處僻

喜陳兄至

黃鳥啼欲歇青梅結半成坐憐春物盡起入東園行
携觴懶獨酌忽聞叩門聲聞人猶喜至何況是陳兄
從容盡日語稠疊長年情勿輕一杯酒可以話平生

贈杓直

世路重位祿栖栖者孔宣人情愛年壽夭死者顏淵
二人如何人不奈命與天我今信多垂撫已愧前賢
已年四十四又爲五品官况茲知足外別有所安焉
早年以身代直赴逍遙篇近歲將心地迴向南宗禪
外順世間法內脫區中緣進不厭朝市退不戀人寰
自吾得此心投足無不安體非道引適意無江湖閒
有興或飲酒無事多掩關寂靜夜深坐安穩日高眠
秋不苦長夜春不惜流年委形老小外忘懷生死間
昨日共君語與余心膺然此道不可道因君聊強言

寄張十八

飢止一簞飯渴止一壺漿出入止一馬寢興止一牀
此外無長物於我有若亡胡然不知足名利心遑遑
念茲彌懶放積習遂爲常經旬不出門竟日不下堂
同病者張生貧僻住延康慵中每相憶此意未能忘
迢迢青槐街相去八九坊秋來未相見應有新詩章
早晚來同■天氣轉清涼

題玉泉寺

湛湛玉泉色悠悠浮雲身閒心對定水清淨兩無塵
手把青筇杖頭戴白綸巾興盡下山去知我是誰人

朝回遊城南

朝退馬未困秋初日猶長回轡城南去郊野正清涼

水竹夾小徑縈迴繞川岫仰看晚山色俯弄秋泉光
青松繫我馬白石爲我牀常時簪組累此日和身忘
且隨鷓鴣末暮遊鷗鶴傍機心一以盡兩處不亂行
誰辨心與跡非行亦非藏

舟行江州路上作

帆影日漸高閒眠猶未起起問鼓枻人已行三十里
船頭有行竈炊稻烹紅鯉飽食起婆婆盥漱秋江水
平生滄浪意一旦來遊此何況不失家舟中載妻子

湓浦早冬

潯陽孟冬月草木未全衰祗抵長安陌涼風八月時
日西湓水曲獨行吟舊詩蓼花始零落蒲葉稍離披
但作城中想何異曲江池

江州雪

新雪滿前山初晴好天氣日西騎馬出忽有京都意
城柳方綴花簷冰纔結穗須臾風日暖處處皆飄墜
行吟賞未足坐歎銷何易猶勝嶺南看紛紛不到地

白氏文集卷第六

白氏文集卷第七

閒適三

古調詩五言凡

題潯陽樓

自此後詩江州司馬時作

常愛陶彭澤文思何高玄又怪韋江州詩情亦清閒
今朝登此樓有以知其然大江寒見底匡山青倚天
深夜溢浦月平旦鑪峯烟清輝與靈氣日夕供文篇
我無二人才孰為來其間因高偶成句俯仰愧江山

訪陶公舊宅

并序

予夙慕陶淵明為人往歲渭川閒居常有劂陶體詩
十六首今遊廬山經柴桑過栗里思其人訪其宅不
能默默又題此詩云

垢塵不污玉靈鳳不啄羶嗚呼陶靖節生彼晉宋間

心實有所守口終不能言永惟孤竹子拂衣首陽山
夷齊合一身窮餓未為難先生有五男與之同飢寒
腸中食不充身上衣不完連徵章不起斯可謂真賢
我生君之後相去五百年每讀五柳傳目想心拳拳
昔嘗詠遺風著為十六篇今來訪故宅森若君在前
不慕樽有酒不慕琴無絃慕君遺榮利老死此丘園
柴桑古村落栗里舊山川不見籬下菊但餘墟中烟
子孫雖無聞族氏猶未遷每逢姓陶人使我心依然

北亭

廬宮山下州湓浦沙邊宅宅北倚高岡迢迢數千尺
上有青青竹竹間多白石茅亭居上頭豁達門四闢
前楹捲簾箔北牖施床席江風萬里來吹我涼淅淅
日高公府歸巾笏隨手擲脫衣恣搔首坐卧任所適
時傾一盃酒曠望湖天夕口詠獨酌謠目送歸飛翮
慙無出塵操未免折腰役偶獲此間居謬似高人跡

游湓水

四月未全熟麥涼江風秋湖山處處好最愛湓水頭
湓水從東來一派入江流可憐似縈帶中有隨風舟
命酒一臨汎捨鞍揚棹謳放廻岸傍馬去逐波間鷗
烟浪始渺渺風襟亦悠悠初疑上河漢中若尋瀛洲
汀樹綠拂池沙草芳未休青蘿與紫葛枝蔓垂相繆
繫纜步平岸回頭望江州城雉映水見隱隱如蜃樓
日入意未盡將歸復少留到官行半歲今日方一遊
此地來何暮可以寫吾憂

答故人

故人對酒歎歎我在天涯見我昔榮遇念我今蹉跎
問我爲司馬官意復如何答云且勿歎聽我爲君歌
我本蓬華人鄙賤劇泥沙讀書未百卷信口嘲風花
自從筮仕來六命三登科顧慙虛劣姿所得亦已多
散員足疵身薄俸可資家省分輒自愧豈爲不遇耶
煩君對杯酒爲我一咨嗟

官舍內新鑿小池

簾下開小池盈盈水方積中底鋪白沙四隅甃青石
勿言不深廣但足幽人適泛灑微雨朝泓澄明月夕
豈無大江外波浪連天白未如床席間方丈深盈尺
清淺可狎弄昏煩聊漱滌最愛曉冥時一片秋天月

宿簡寂觀

巖白雲尚屯林紅葉初隕秋光引閒步不知身遠近
夕投靈洞宿卧覺塵機泯名利心旣忘市朝夢亦盡
暫來尚如此况乃終身隱何以療夜飢一匙雲母粉

讀謝靈運詩

吾聞達士道窮通順冥數通乃朝廷來窮即江湖去
謝公才廓落與世不相遇壯志鬱不用須有所洩處
洩爲山水詩逸韻諧竒趣大必籠天海細不遺草樹
豈惟翫景物亦欲攄心素徃徃即事中未能忘興諭
因知康樂作不獨在章句

北亭獨宿

悄悄壁下床紗籠耿殘燭夜半獨眠覺疑在僧房宿

約心

黑鬢絲雪侵青袍塵土沈兀兀復騰騰江城一上佐
朝就高齋上薰然負暄卧晚下小池前澹然臨水坐
已約終身心長如今日過

晚望

江城高角動沙洲夕鳥還獨坐高亭上西南望遠山

早春

雪消冰又釋景和風復暄滿庭田地濕薺葉生墻根
官舍悄無事日西斜掩門不開莊老卷欲與何人言

春寢

何處春暄來微和生血氣氣薰肌骨暢東窓一昏睡
是時正月晦假日無公事爛熳不能休日午將及未

緬思少健日甘寢

而自恣一從衰疾來枕上無此時

睡起晏坐

後亭晝眠足起坐春景暮新覺眼猶昏無思心正住
淡寂歸一性虛閒遺萬慮了然此時心無物可譬喻
本是無有鄉亦名不用處行禪與坐忘同歸無異路

道書云無何有之鄉禪經云不用處二者殊名而同歸

詠懷

盡日松下坐有時池畔行行立與坐卧中懷澹無營
不覺流年過亦任白髮生不為世所薄安得遂閒情

春遊西林寺

下馬西林寺翛然進輕策朝為公府吏暮作靈山客
二月匡廬北冰雪始消釋陽叢抽茗芽陰竇洩泉脉

熙熙風土暖藹藹雲嵐積散作萬壑春疑爲一氣碧
身閒易澹泊官散無牽迫緬彼十八人古今同此適
昔遠宗雷等十八賢同隱于西林寺是年淮寇起處處興兵革智士勞
思謀戎臣苦征役獨有不才者山中弄泉石

出山吟

朝詠遊仙詩暮歌采薇曲臥雲坐白石山中十五宿
行隨出洞水回別綠巖竹早晚重來遊心期瑤草綠

歲暮

已任時命去亦從歲月除中心一調伏外累盡空虛
名宦意已矣林泉計何如擬近東林寺溪邊結一廬

聞早鶯

日出眠未起屋頭聞早鶯忽如上林曉萬年枝上鳴

憶爲近臣時秉筆直承明春深視草暇旦暮聞此聲
今聞在何處寂寞潯陽城鳥聲信如一分別在人情
不作天涯意豈殊禁中聽

栽杉

勁葉森利劍孤莖挺端標纔高四五尺勢若干青霄
移栽東窓前愛爾寒不凋病夫卧相對日夕聞蕭蕭
昨爲山中樹今爲簷下條雖然遇賞翫無乃近塵囂
猶勝澗谷底埋沒隨衆樵不見鬱鬱松委質山上苗

過李生

蘋小蒲葉短南湖春水生子近湖邊住靜境稱高情
我爲郡司馬散拙無所營使君知性野衙退任閒行
行携小榼去逢花輒獨傾半酣到子舍下馬扣柴荆

何以引我步繞籬竹萬莖何以醒我酒吳音吟一聲
須臾進野飯飯稻茹芹英白甌青竹筍儉潔無羶腥
欲去復徘徊夕鴉已飛鳴何當重遊此待君湖水平

詠意

常聞南華經巧勞智憂愁不如無能者飽食但遨遊
平生愛慕道今日近此流自來潯陽郡四序忽已周
不分物黑白但與時沉浮朝食夕安寢用是爲身謀
此外即閒放時尋山水幽春遊慧遠寺秋上庾公樓
或吟詩一章或飲茶一甌身心一無繫浩浩如虛舟
富貴亦有苦苦在心危憂貧賤亦有樂樂在身自由

食笋

此州乃竹鄉春笋滿山谷山夫折盈抱抱來早市鬻
物以多爲賤雙錢易一束置之炊甌中與飯同時孰

紫箨拆故錦素肌擘新玉每食遂加食經旬不思肉
久爲京洛客此味常不足且食勿踟躕南風吹作竹

遊石門澗

石門無舊徑披榛訪遺跡時逢山水秋清輝如古昔
常聞慧遠輩題詩此巖壁雲覆莓苔封蒼然無處覓
蕭疎野生竹崩剝多年石自從東晉後無復人遊歷
獨有秋澗聲潺湲空旦夕

招東鄰

小榼二升酒新簞六尺床能來夜話否池畔欲秋涼

題元十八溪亭

亭在廬山東
南五老峯下

怪君不喜仕又遊烟霞里今日到幽居了然知所以

宿君石溪亭潺湲聲滿耳飲君螺盃酒醉卧不能起
見君五老峯益悔居城市愛君三男兒始歎身無子
余方鑪峯下結室爲居士山北與山東往來從此始
香鑪峯下新置草堂即事詠懷題於石上

香鑪峯北面遺愛寺西偏白石何鑿鑿清流亦潺潺
有松數十株有竹千餘竿松張翠傘蓋竹倚青琅玕
其下無人居惜哉多歲年有時聚猿鳥終日空風烟
時有沉冥子姓白字樂天平生無所好見此心依然
如獲終老地忽乎不知遷架巖結茅宇斲壑開茶園
何以洗我耳屋頭飛落泉何以洗我眼砌下生白蓮
左手携一壺右手挈五絃傲然意自足箕踞於其間
興酣仰天歌歌中聊寄言言我本野夫誤爲世網牽

時來昔捧日老去今歸山倦鳥得茂樹涸魚反清源
捨此欲焉往人間多險難

草堂前開一池養魚種荷日有幽趣

淙淙三峽水浩浩萬頃波未如新塘上微風動漣漪
小萍加汎汎初蒲正離離紅鯉二三寸白蓮八九枝
遶水欲成徑護堤方插籬已被山中客呼作白家池

白雲期

黃石巖
下作

三十氣太壯胷中多是非六十身太老四體不支持
四十至五十正是退閒時年長識命分心慵少營爲
見酒興猶在登山力未衰吾年幸當此且與白雲期

登香鑪峯

迢迢香鑪峯心存耳目想終年牽物役今日方一往

攀蘿躡危石手足勞俯仰同遊三四人兩人不取上
上到峯之頂目眩心忪况高低有萬尋濶狹無數丈
不窮視聽界焉識宇宙廣江水細如繩溢城小於掌
紛吾何屑屑未能脫塵鞅歸去思自嗟低頭入蟻壤
谷崔侍郎錢舍人書問因繼以詩

且暮兩蔬食日中一間眠便是了一日如此已三年
心不擇時適足不揀地安窮通與遠近一貫無兩端
常見今之人其心或不然在勞則念息處靜已思喧
如是用身心無乃自傷殘坐輸憂惱使安得形神全
吾有二道友藹藹崔與錢同飛青雲路獨墮黃泥泉
歲暮物萬變故情何不遷應爲平生心與我同一源
帝鄉遠於日美人高在天誰謂萬里別常若在目前
泥泉樂者魚雲路遊者鸞勿言雲泥異同在逍遙間
因君問心地書後偶成篇慎勿說向人人多笑此言

烹葵

昨卧不夕食今起乃朝炊貧厨何所有炊稻烹秋葵
紅粒香復軟綠英滑且肥飢來止於飽飽後復何思
憶昔榮遇日迨今窮退時今亦不凍餒昔亦無餘資
口既不減食身亦不減衣撫心私自問何者是榮衰
勿學常人意其間分是非

小池二首

晝倦前齋熱晚愛小池清映林餘景沒近水微涼生
坐把蒲葵扇閒吟三兩聲

有意不在大湛湛方丈餘荷側瀉清露萍開見游魚
每一臨此坐憶歸青溪居

閉關

我心忘世久世亦不我干遂成一無事因得長掩關
掩關來幾時髣髴二三年著書已盈帙生子欲能言
始悟身易老復悲世多難迴顧趨時者役役塵壤間
歲暮竟何得不如且安閒

弄龜羅

有姪始六歲字之爲阿龜有女生三年其名曰羅兒
一始學笑語一能誦歌詩朝戲抱我足夜眠枕我衣
汝生何其晚我年行已衰物情小可念人意老多慈
酒美音湏壞月圓終有虧亦如恩愛緣乃是憂惱資

舉世同此累吾安能去之

截樹

種樹當前軒樹高柯葉繁惜哉遠山色隱此蒙籠間
一朝持斧斤手自截其端萬葉落頭上千峯來面前
忽似決雲霧豁達覩青天又如所念人久別一欵顏
始有清風至稍見飛鳥還開懷東南望目遠心遼然
人各有偏好物莫能兩全豈不愛柔條不如見青山

望江樓上作

江畔百尺樓樓前千里道憑高望平遠亦足舒懷抱
驛路使憧憧關防兵草草及茲多事日猶覺閒人好
我年過不惑休退誠非早從此拂塵衣歸山未爲老

題座隅

手不任執及肩不能荷鋤量力揆所用曾不敵一夫
幸因筆硯功得升仕進途歷官凡五六祿俸及妻孥
左右有兼僕出入有單車自奉雖不厚亦不至飢飭
若有人及此傍觀爲何如雖賢亦爲幸况我鄙且愚
伯夷古賢人魯山亦其徒時哉無奈何俱化爲餓殍
元魯山山居阻水食絕而終念彼益自愧不敢忘斯湏平生榮利
心破滅無遺餘猶恐塵妄起題此於座隅

昔與微之在朝日因蓄休退之心迨今十年

淪落老大追尋前約且結後期

往子爲御史伊余忝拾遺皆逢盛明代俱登清近司
予繫玉爲珮子曳繡爲衣從容香烟下同侍白玉墀
朝見寵者辱暮見安者危紛紛無退者相顧令人悲
宦情君早厭世事我深知常如榮顯自巳約林泉期
况今各流落身病齒髮衰不作卧雲計携手欲何之
待君女嫁後及我官滿時稍無骨肉累粗有漁樵資
歲晚青山路白首期同歸

垂釣

臨水一長嘯忽思十年初三登甲乙第一入承明廬
浮生多變化外事有盈虛今來伴江叟沙頭坐釣魚

晚燕

百鳥乳雛畢秋燕獨蹉跎去社日已近御泥意如何
不悟時節晚徒施工用多人間事亦爾不獨燕營窠

贖鷄

清晨臨江望水禽正誼繁鳧雁與鷗鷺游颺戲朝暾

適有鸞雞者挈之來遠村飛鳴彼何樂窘束此何寬
嗉嗉十四雛罩縛同一樊足傷金距蹠頭搶花冠翻
經宿費飲啄日高詣屠門遲迴未死間飢渴欲相吞
常慕古人道仁信及魚豚見茲生惻隱贖放雙林園
開籠解索時雞雞聽我言與爾鏹三百小惠何足論
莫學御環雀崎嶇謾報恩

秋日懷杓直

時杓直出
牧澧州

晚來天色好獨出江邊步憶與李舍人曲江相近住
常云遇清景必約同幽趣若不訪我來還須覓君去
開眉笑相見把手期何處西寺老胡僧南園亂松樹
携持小酒榼吟詠新詩句同出復同歸從朝直至暮
風雨忽消散江山眇回互潯陽與涪陽相望空雲霧
心期自乖曠時景還如故今日郡齋中秋光誰共度

食後

食罷一覺睡起來兩甌茶舉頭看日影已復西南斜
樂人惜日促憂人歎年餘無憂無樂者長短任生涯

齊物二首

青松高百尺綠蕙低數寸同生大塊間長短各有分
長者不可退短者不可進若用此理推窮通兩無悶
二

椿壽八千春槿花不經宿中間復何有冉冉孤生竹
竹身三年老竹色四時綠雖謝椿有餘猶勝槿不足
山下宿

獨到山下宿靜向月中行何處水邊碓夜春雲母聲

題舊寫真圖

我昔三十六寫貌在丹青我今四十六衰頽卧江城
豈比十年老曾與衆苦并一照舊圖畫無復昔儀形
形影默相顧如弟對老兄况使他人見能不昧平生
義和鞭日走不爲我少停形骸屬日月老去何足驚
所恨凌烟閣不得畫功名

閒居

肺病不飲酒眼昏不讀書端然無所作身意閒有餘
雞棲籬落晚雪映林木踈幽獨已云極何必山中居
對酒示行簡

今日一樽酒歡暢何怡怡此樂從中來他人安得知
兄弟唯二人遠別恒苦悲今春自巴峽萬里平安歸
復有雙幼妹笄年未結褵昨日嫁娶畢良人皆可依
憂念兩消釋如刀斷羈縻身輕心無繫忽欲凌空飛
人生苟有累食肉常如飢我心旣無苦飲水亦可肥
行簡勸爾酒停盃聽我辭不歎鄉國遠不嫌官祿微
但願我與爾終老不相離

詠懷

冉求與顏淵卞和與馬遷或罹天夭極或被人刑殘
顧我信爲幸百骸且完全五十不爲夭吾今欠數年
知分心自足委順身常安故雖窮退日而無戚戚顏
昔有榮先生從事於其間今我不量力舉心欲攀援
窮通不由已歡戚不由天命卽無奈何心可使泰然
且務由已者省躬諒非難勿問由天者天高難與言

夜琴

蜀桐木性實楚絲音韻清調慢絃且緩夜深十數聲
入耳淡無味愜心潛有情自弄還自罷亦不要人聽

山中獨吟

人各有一癖我癖在章句萬緣皆已消此病獨未去
每逢美風景或對好親故高聲詠一篇恍若與神遇
自為江上客半在山中住有時新詩成獨上東巖路
身倚白石崖手攀青桂樹狂吟驚林壑猿鳥皆窺覷
恐為世所嗤故就無人處

達理二首

何物壯不老何時窮不通如彼音與律宛轉旋為宮
我命獨何薄多悴而少豐當壯已先衰暫泰還長窮
我無奈命何委順以待終命無奈我何方寸如虛空
曹然與化俱混然與俗同誰能坐此苦齟齬於其中

二

舒姑化為泉牛哀病作虎或柳生肘間或男變為女
鳥獸及水木本不與民伍胡然生變遷不待死歸土
百骸是已物尚不能為主况彼時命間倚伏何足數
時來不可遏命去焉能取唯當養浩然吾聞達人語

湖亭晚望殘水

湖上秋沈寥湖邊晚蕭瑟登亭望湖水水縮湖底出
清淨得早霜明滅浮殘日流注隨地勢窪坳無定質
泓澄白龍卧宛轉青蛇屈破鏡折劍頭光芒又非一
久為山水客見盡幽竒物及來湖亭望此狀難談悉

乃知天地間勝事殊未畢

郭虛舟相訪

朝暖就南軒暮寒歸後屋晚酌一兩盃夜棊三局
寒灰埋暗火曉焰凝殘燭不嫌貧冷人時來同一宿

白氏文集卷第七

白氏文集卷第八

間適四

古調詩五言
凡五十七首

長慶二年七月自中書舍人出守杭州路次

藍溪作

太原一男子自顧庸且鄙老逢不次恩洗拔出泥滓
既居可言地願助朝廷理伏閣三上章驚愚不稱肯
聖人存大體優貸容不死鳳詔停舍人魚書除刺史
寘懷齊寵辱委順隨行止我自得此心于茲十年矣
餘杭乃名郡郡郭臨江汜已想海門山潮聲來入耳
昔予貞元末羈旅曾遊此甚覺太守尊亦譜魚酒美
平生江海興每羨滄浪水尚擬拂衣行況今兼祿仕
青山峰巒接白日烟塵起東道旣不通改轅遂南指

白氏
家藏

自秦窮楚越浩蕩五千里聞有賢主人而多好山水
是行頗爲愜所歷良可紀策馬渡藍溪勝遊從此始

初出城留別

朝從紫禁歸暮出青門去勿言城東陌便是江南路
揚鞭簇車馬揮手辭親故我生本無鄉心安是歸處

過駱山人野居小池

駱生弃官居此二十餘年

茅覆環堵亭泉添方丈沼紅芳照水荷白頸觀魚鳥
拳石苔蒼翠尺波烟杳眇但問有意無勿論池大小
門前車馬路奔走無昏曉名利驅人心賢愚同擾擾
善哉駱處士安置身心了何乃獨多君丘園居者少

宿清源寺

往謫潯陽去夜憇朝溪曲今爲錢塘行重經茲寺宿

爾來幾何歲溪草二八綠不見舊房僧蒼然新對
虛空走日月世界遷陵谷我生寄其間孰能逃倚伏
隨緣又南去好住東廊竹

宿藍溪對月

昨夜鳳池頭今夜藍溪口明月本無心行人自回首
新秋松影下半夜鐘聲後清影不宜昏聊將茶代酒

自望秦赴五松驛馬上偶睡醒覺成吟

長途發已久前館行未至體倦目已昏瞋然遂成睡
右袂尚垂鞭左手暫委轡忽覺問僕夫纔行百步地
形神分處所遲速相乖異馬上幾多時夢中無限事
誠哉達人語百齡同一寐

鄧州路中作

蕭蕭誰家村秋梨葉半折漠漠誰家園秋韭花初白
路逢故里物使我嗟行役不歸渭北材又作江南客
去鄉徒自苦濟世終無益自問波上萍何如澗中石

朱藤杖紫駘馬吟

拄上山之上騎下山之下江州去日朱藤杖忠州歸
日紫駘馬天生二物濟我窮我生合是栖栖者

桐對館重題

堦前下馬時梁上題詩處慘淡病使君蕭疎老松對
自嗟還自哂又向杭州去

過紫霞蘭若

我愛此山頭及此三登歷紫霞舊精舍寥落空泉石
朝市日喧隘雲林長悄寂猶存住寺僧冝有歸山客

感舊紗帽帽即故李侍郎所贈

昔君烏紗帽贈我白頭翁帽今在頂上君已歸泉中
物故猶堪用人亡不可逢岐山今夜月墳樹正秋風

思竹窓

不憶西省松不憶南宮菊西省大院有松南宮本廳有菊唯憶新昌
堂蕭蕭北窓竹窓間枕簟在來後何人宿

馬上作

處世非不遇榮身頗有餘勲為上柱國爵乃朝大夫
自問有何才兩入承明廬又問有何政再駕朱輪車
矧予東山人自性朴且疎彈琴復有酒但慕嵇阮徒
聞被鄉里薦誤上賢能書一列朝士籍遂為世網拘
高有晉綴憂下有陷穽虞每覺宇宙窄未嘗心體舒

蹉跎二十年領下生白鬚何言左遷去尚獲專城居
杭州五千里往若投淵魚雖未脫簪組且來泛江湖
吳中多詩人亦不少酒沽高聲詠篇什大笑飛杯盃
五十未全老尚可且歡娛用茲送日月君以爲何如
秋風起江上白日落路隅回首語五馬去矣勿踟躕

秋蝶

秋花紫蒙蒙秋蝶黃茸茸花低蝶新小飛戲叢西東
日暮涼風來紛紛花落叢夜深白露冷蝶已死叢中
朝生夕已死氣類各相從不見千年鶴多棲百丈松

登商山最高頂

高高此山頂四望唯烟雲下有一條路通達楚與秦
或名誘其心或利牽其身乘者與負者來去何紛紛
我亦斯人徒未能出囂塵七年三往復何得笑他人

枯桑

道傍老枯樹枯來非一朝皮黃外尚活心黑中先焦
似有多憂者非因外火燒

山路偶興

筋力未全衰僕馬不至弱又多山水趣心賞非寂寞
捫蘿上烟嶺踏石穿雲壑谷鳥晚仍啼洞花秋不落
提籠復携榼遇勝時停泊泉懃茶數甌嵐行酒一酌
獨吟還獨笑此興殊未惡假使在城時終年有何樂

山雉

五步一啄草十步一飲水適性遂其生時哉山梁雉
梁上無罾線梁下無鷹鷂雌雄與羣雛皆得終天年

嗟嗟籠下雞及彼池中鴈既有稻梁恩必有犧牲患
初下漢江舟中作寄兩省給舍

秋水浙紅粒朝烟烹白鱗一食飽至夜一臥安達晨
晨無朝謁勞夜無直宿勤不知兩掖客何似扁舟人
尚想到郡日且稱守土臣猶須副憂寄恤隱安疲民
暮年度報政三年當退身終使滄浪水濯吾纓上塵
自蜀江至洞庭湖口有感而作

江從西南來浩浩無旦夕長波逐若瀉連山鑿如劈
千年不壅潰萬姓無墊溺不爾民爲魚大哉禹之績
導岷旣艱遠距海無咫尺胡爲不訖功湖水斯委積
洞庭與青草大小兩相敵混合萬丈深森茫千里白
每歲秋夏時浩大吞七澤水族窟穴多農人土地窄

我今尚嗟嘆禹豈不愛惜邈未究其由想古觀遺跡
疑此苗人頑恃嶮不終役帝亦無奈何留患與今昔
水流天地內如身有血脉滯則爲疽疣治之在鍼石
安得禹復生爲唐水官伯手提倚天劍重來親指畫
䟽河似剪紙決壅如裂帛滲作膏腴田踏平魚鼈宅
龍宮變閭里水府生禾麥坐添百萬戶書我司徒籍

初領郡政衙退登東樓作

自此後詩到
杭州後作

鰥惇心所念簡牘手自操何言符竹貴未免州縣勞
賴是餘杭郡臺榭遶官曹凌晨親政事向晚恣遊遨
山冷微有雪波平未生濤水心如鏡面千里無纖毫
直下江最闊近東樓更高煩襟與滯念一望皆遁逃
清調吟

索索風戒寒沉沉日藏耀勸君飲濁醪聽我吟清調
芳節變窮陰朝光成夕照與君生此世不合長年少
今晨從此遊明日安能料若不結跏禪即須開口笑

狂歌詞

明月照君席白露霑我衣勸君酒杯滿聽我狂歌詞
五十已後衰二十已前癡晝夜又分半其間幾何時
生前不歡樂死後有餘資焉用黃墟下珠衾玉匣爲

郡亭

平旦起視事亭午臥掩關除親薄領外多在琴書前
況有虛白亭坐見海門山潮來一凭檻賓至一開筵
終朝對雲水有時聽管絃持此聊過日非忙亦非閒
山林太寂寞朝闕空喧煩唯茲郡閣內囂靜得中間

詠懷

昔爲鳳閣郎今爲二千石自覺不如今人言不如昔
昔雖居近密終日多憂惕有詩不敢吟有酒不敢喫
今雖在踈遠竟歲無牽役飽食坐終朝長歌醉通夕
人生百年內疾速如過隙先務身安閒次要心歡適
事有得而失物有損而益所以見道人觀心不觀跡

立春後五日

立春後五日春態紛婀娜白日斜漸長碧雲低欲墮
殘冰拆玉片新萼排紅顆遇物盡欣欣愛春非獨我
迎芳後園立就暖前簷坐還有惆悵心欲別紅爐火

郡中即事

漫漫潮初平熙熙春日空闊遠江山清明好天氣

外有適意物中無繫心事數篇對竹吟一杯望雲醉
行移杖扶力臥讀書取睡久養病形骸深諳閒氣味
遙思九城陌擾擾趨名利今朝是雙日朝謁多軒騎
寵者防悔尤權者懷憂畏爲報高車蓋恐非真富貴
郡齋暇日辱常州陳郎中使君早春晚坐水
西館書事詩十六韻見寄亦以十六韻酬
之

新年多暇日晏起寒簾坐睡足心更慵日高頭未裹
徐傾下藥酒稍藝煎茶火誰伴寂寥身無絃琴在左
遙思毘陵官春深物嫋娜波拂黃柳梢風搖白梅朶
衙門排曉戟鈴閣開朝鎖太守水西來朱衣坐素舸
良辰不易得佳會無由果五馬正相望雙魚忽前墮
魚中獲瑰寶持翫何磊砢一百六十言字字靈珠顆
上申心欸曲下叙時輒軻才富不如君道孤還似我
敢辭官遠慢且貴身安妥勿復問榮枯冥心無不可

官舍

高樹換新葉陰陰覆地隅何言太守宅有侶幽人居
太守卧其下閒慵兩有餘起嘗一甌茗行讀一卷書
早梅結青實殘櫻落紅珠稚女弄庭果嬉嬉牽人裾
是日晚彌靜巢禽不相呼嘖嘖護兒鵲啞啞母子烏
豈唯云鳥爾吾亦引吾雛

吾雛

吾雛字阿羅阿羅纔七齡嗟吾不才子憐爾無弟兄
撫養雖驕駭性識頗聰明學母畫眉樣効吾詠詩聲

我齒今欲墮汝齒昨始生我頭髮盡落汝頂髻初成
老幼不相待父衰汝孩嬰緬想古人心慈愛亦不輕
蔡邕念文姬于公嘆緹縈敢求得汝力但未忘父情

題小橋前新竹招客

鴈齒小紅橋坐簷低白屋橋前何所有萋萋新生竹
皮開拊褐錦節露抽青玉筠翠如可食粉霜不忍觸
間吟聲未已幽翫心難足管領好風烟輕欺凡草木
誰能有月夜伴我林中宿爲君傾一杯狂歌竹枝曲
病中逢秋招客夜酌

不見詩酒客臥來半月餘合和新藥草尋檢舊方書
晚霽烟景度早涼牕戶虛雪生衰鬢久秋入病心初
臥簟斲竹涼風襟叩葛踈夜來身校健小飲復如何

食飽

食飽拂枕臥睡足起開吟淺酌一杯酒緩彈數聲琴
既可暢情性亦足傲光陰誰知名利盡無復長安心

嚴十八郎中在郡日改制東南樓因名清輝

未立標榜徵歸郎署予既到郡性愛樓居

宴遊其間頗有幽致聊成十韻兼戲寄嚴

嚴郎制茲樓立名曰清輝未及署花榜遽徵還粉闈
去來三四年塵土登者稀今春新太守洒掃施簾幃
院柳烟婀娜簷花雪霏微看山倚前戶待月闌東扉
碧牕戛琤瑟朱闌飄舞衣燒香捲幕坐風燕雙雙飛
君作不得住我來幸因依始知天地間靈境有所歸

南亭對酒送春

含桃實已落紅薇花尚薰冉冉三月盡晚鶯城上聞
獨持一杯酒南亭送殘春半酣忽長歌歌中何所云
云我五十餘未是苦老人刺史二千石亦不爲賤貧
天下三品官多老於我身同年登第者零落無一分
親故半爲鬼僮僕多見孫念此聊自解逢酒且歡欣

○ 翫新庭對因詠所懷

靄靄四月初新對葉成陰動搖風景麗蓋覆庭院深
下有無事人竟日此幽尋豈唯翫時物亦可開煩襟
將與道人語或聽詩客吟度春足芳色入夜多鳴禽
獨得幽閒境遂忘塵俗心始知真隱者不必在山林

仲夏齋戒月

仲夏齋戒月三旬斷腥羶自覺心骨爽行起身翩翩
始知絕粒人四體更輕便初能脫病患久必成神仙
禦寇馭冷風赤松游紫烟常疑此說謬今乃知其然
我年過半百氣衰神不全已墜兩鬢絲難補三丹田
但減葷血味稍結清淨緣脫巾且修養聊以終天年

除官去未間

除官去未間半月恣遊討朝尋霞外寺暮宿波上島
新對少於松平湖半連草躋攀有次第賞翫無昏早
有時騎馬醉兀兀冥天造窮通與生死其奈吾懷抱
江山信爲美齒髮行將老在郡誠未厭歸鄉去亦好

三年爲刺史二首

三年爲刺史無政在人口唯向郡城中題詩十餘首
慙非甘棠詠豈有人思否

三年爲刺史飲水復食蕪唯向天竺山取得兩片石
此抵有千金無乃傷清白

別萱桂

使君竟不住萱桂徒栽種桂有留人名萱無忘憂用
不如江畔月步步來相送

自餘杭歸宿淮口作

爲郡多已暇猶少勤吏職罷郡更安閒無所勞心力
舟行明月下夜泊清淮北豈止吾一身舉家同燕息
三年請祿俸頗有餘衣食乃至僮僕間皆無凍餒色
行行弄雲水步步近鄉國妻子在我前琴書在我側
此外吾不知於焉心自得

舟中李山人訪宿

日暮舟悄悄烟生水沉沉何以延宿客夜酒與秋琴
來客道門子來自松高岑軒軒舉雲貌豁豁開清襟
得意言語斷入絃滋味深默然相顧晒心適而忘心

洛下卜居

三年典郡歸所得非金帛天竺石兩片華亭鶴一隻
飲啄供稻梁苞裹用茵席誠知是勞費其奈心愛惜
遠從餘杭郭回到洛陽陌下擔拂雲根開籠展霜翮
貞姿不可雜高性宜其適遂就無塵坊仍求有水宅
東南得幽境對老寒泉碧池畔多竹陰門前少人跡
未請中庶祿且脫雙驂易買後道宅價不足豈獨爲
身謀安吾鶴與石

洛中偶作自此後在東都作

五年職翰林四年蒞潯陽一年巴郡守半年南宮郎
二年直綸閣三年刺史堂凡此十五載有詩千餘章
境與周萬象土風備四方獨無洛中作能不心悵悵
今爲春宮長始來遊此鄉徘徊伊瀾上睥睨嵩少徬
遇物輒一詠一詠傾一觴筆下成釋憾卷中同補亡
往往顧白晒眼昏鬢蒼蒼不知老將至猶自放詩狂

贈蘓少府

籍甚二十年今日方欸顏相送嵩洛下論心杯酒間
何爲懶出入府寮多閉關蒼髮彼此老白日尋常閒
朝欲携手出暮思聯騎還何當挈一榼同宿龍門山

移家入新宅

移家入新宅罷郡有餘資既可避燥濕復免憂寒飢
疾平未還假官閒得分司幸有俸祿在而無職役羈
清旦盥漱畢開軒卷簾幃家人及雞犬隨我亦熙熙
取興不過酒放情或作詩何必苦修道此即是無爲
外累信已遣中懷時有思有思一何遠默坐低雙眉
十載囚竄客萬里征戍兒春朝鑲籠鳥冬夜支牀龜
驛馬走四蹄痛酸無歇期磴牛封兩目昏閉何人知
誰能脫放去四散任所之各得適其性如吾今日時

琴

置琴曲几上慵坐但含情何煩故揮弄風絃自有聲

鶴

人各有所好物固無常宜誰謂爾能舞不如閒立時

自詠

夜鏡隱白髮朝酒發紅顏
可憐假年少自笑須臾間
朱砂賤如土不解燒為丹
玄鬢化為雪未聞休得官
咄哉箇丈夫心性何墮頑
但遇詩與酒便忘寢與飧
高聲發一吟似得詩中仙
引滿飲一杯盡忘身外緣
昔有醉先生席地而幕天
于今居處在許我當中眠
眠罷又一酌酌罷又一篇
回面顧妻子生計方落然
誠知此事非又過知非年
豈不欲自改改即心不安
且向安處去其餘皆老閒

林下閒步寄皇甫庶子

扶杖起病初策馬力未任
旣懶出門去亦無客來尋
以此遂成閒閒步遶園林
天曉烟景淡樹寒鳥雀深

一酌池上酒數聲竹間吟
寄言東曹長當知幽獨心

晏起

鳥鳴庭樹上日照屋簷時
老去慵轉極寒來起猶遲
厚薄被適性高低枕得宜
神安體穩暖此味何人知
睡足仰頭坐兀然無所思
如未鑿七竅若都遺四肢
緬想長安客早朝霜滿衣
彼此各自適不知誰是非

池畔二首

結構池西廊疏理池東樹
此意人不知欲為待月處
二
持刀剽密竹竹少風來多
此意人不會欲令池有波

春葺新居

江州司馬日忠州刺史時
栽松滿後院種柳蔭前墀

彼皆非吾士栽種尚忘疲況茲是我宅葺藝固其宜
平旦領僕使乘春親指揮移花夾暖室洗竹覆寒池
池水變綠色池芳動清輝尋芳弄水坐盡日心熙熙
一物苟可適萬緣都若遺設如宅門外有事吾不知

贈言

捧籛獻千金彼金何足道臨觴贈一言此言真可寶
流光我已晚適意君不早況君春風面柔促如芳草
二十方長成三十向衰老鏡中桃李色不得十年好
胡爲坐脉脉不肯傾懷抱

泛春池

白蘋湘渚曲綠篠剡溪口各在天一涯信美非吾有
如何此庭內水竹交左右霜竹百千竿烟波六七畝

泓澄動堦砌淡泞映戶牖蛇皮細有紋鏡面清無垢
主人過橋來雙童扶一叟恐污清冷波塵纓先料機
波上一葉舟舟中一樽酒酒開舟不繫去去隨所偶
或遶蒲浦前或泊桃島後未撥落杯花低衝拂面柳
半酣迷所在倚榜兀回首不知此何處復是人窠否
誰知始䟽鑿幾主相傳受楊家去云遠田氏將非久
天與愛水人終焉落吾手

此池始楊常侍開鑿中間田氏爲主予今有之蒲浦

桃島皆池上所有

白氏文集卷第八

白氏文集卷第九

感傷一

古調詩五言
凡五十五首

西明寺牡丹花時憶元九

前年題名處今日看花來一作芸香吏三見牡丹開
豈獨花堪惜方知老暗催何況尋花伴東都去未迴
詎知紅芳側春盡思悠哉

傷楊弘貞

顏子昔短命仲尼惜其賢楊生亦好學不幸復徒然

一作今
復然

誰識天地意獨與龜鶴一作蛇

作年

權攝昭應早秋書事寄元拾遺兼呈李司錄
夏閏秋候早七月風騷騷渭川烟景晚驪山宮殿高
丹殿子司諫赤縣我徒勞相去半日程不得同遊遨

到官來十日覽鏡生二毛
可憐趨走吏塵土滿青袍
郵傳擁兩驛簿書堆六曹
爲問網紀掾何必使鉛刀

新栽竹

佐邑意不適閉門秋草生
何以娛野性種竹百餘莖
見此溪上色憶得山中情
有時公事暇盡日遶欄行
勿言根未固勿言陰未成
已覺庭宇內稍稍有餘清
最愛近牕臥秋風枝有聲

秋霖中過尹縱之仙遊山居

慘慘八月暮連連三日霖
邑居尚愁寂況乃在山林
林下有志士苦學惜光陰
歲晚千萬慮併入方寸心
岩鳥共旅宿草虫伴愁吟
秋天牀席冷雨夜燈火深
冷君寂寞意携酒一相尋

寄江南兄弟

分散骨肉戀趨馳名利牽
一奔塵埃馬一汎風波船
忽憶分手時憫然秋風前
別來朝復夕積日成七年
花落城中池春深江上天
登樓東南望鳥滅烟蒼然
相去復幾許道里近三千
平地猶難見况乃隔山川

曲江早秋

三年作

秋波紅蓼水夕照青蕪岬
獨信馬蹄行曲江池四畔
早涼晴後至殘暮暝來散
方喜炎燠清復嗟時節換
我年三十六冉冉昏復旦
人壽七十稀七十新過半
且當對酒笑勿起臨風嘆

寄題塾屋聽前雙松

兩松自仙遊山移植縣廳

憶昨爲吏日折腰多苦辛
歸家不自適無計慰心神

手栽兩對松聊以當嘉賓春來日一往生意漸欣欣
清韻度秋在綠葦隨日新始憐澗底色不憶城中春
有時書掩關雙影對一身盡日不寂寞意中如三人
忽奉宣室詔微爲文苑臣閒來一惆悵長似別交親
早知烟翠前攀翫不逡巡悔從白雲裡移爾落翬塵
翰林院中感秋懷王質夫王居仙遊山

何處感時節新蟬禁中聞宮槐有秋意風夕花紛紛
寄跡鴛鷺行歸心鷗鶴羣唯有王居士知予憶白雲
何日仙遊寺潭前秋見君

禁中月

海上明月出禁中清夜長東南樓殿曰稍稍上宮墻
淨落金塘水明浮玉砌霜不比人間見塵土污清光

贈賣松者

一束蒼蒼色如從澗底來斲掘經幾日枝葉滿塵埃
不買非他意城中無地栽

初見白髮

白髮生一莖朝來明鏡裏勿言一莖少滿頭從此始
青山方遠別黃綬初從仕未料容髻間蹉跎忽如此
別元九後詠所懷

零落桐葉雨蕭條槿花風悠悠早秋意生此幽閒中
况與故人別中懷正無悰勿云不相送心到青門東
相知豈在多但問同不同同心一人去坐覺長安空

禁中秋宿

風翻朱裏幕雨冷通中枕耿耿背斜燈秋牀一人寢

早秋曲江感懷

離離暑雲散，嫋嫋涼風起。池上秋又來，荷花半成子。
朱顏自消歇，白日無窮已。人壽不如山，年光急於水。
青蕪與紅蓼，歲歲秋相似。去歲此悲秋，今我復來此。

寄元九

身爲近密拘心爲名檢，縛月夜與花時少。逢杯酒樂
唯有元夫子，閒來同一酌。把手或酣歌，展眉時笑謔。
今春除御史，前月之東洛。別來未開顏，塵埃滿樽杓。
蕙風晚香盡，槐雨餘花落。秋意一蕭條，離容兩寂寞。
况隨白日老，共負青山約。誰識相念心，鞞鷹與籠鶴。
春暮寄元九

梨花結成實，燕卵化爲雛。時物又若此，道情復何如。

但覺日月促，不嗟年歲徂。浮生都是夢，老小亦何殊。
唯與故人別，江陵初謫居。時時一相見，此意未全除。

早梳頭

夜沐早梳頭，惺明秋鏡曉。颯然握中髮，一沐知一少。
年事漸蹉跎，世緣方繳繞。不學空門法，老病何由了。
未得無生心，白頭亦爲夭。

出關路

山川函谷路，塵土游子顏。蕭條去國意，秋風生故關。
別舍弟後月夜

悄悄初別後，去住兩盤桓。行子孤燈店，居人明月軒。
平生共貧苦，未必日成歡。及此暫爲別，懷抱已憂煩。
况是庭葉盡，復思山路寒。如何爲不念，馬瘦衣裳單。

新豐路逢故人

塵土長路晚風烟廢宮秋相逢立馬語盡日此橋頭
知君不得意鬱鬱來西遊惆悵新豐店何人識馬周
行年欲四十有女曰金鑿生來始周歲學坐未能言
慙非達者懷未免俗情伶從此累身外徒云慰目前
若無天折患則有婚嫁牽使我歸山計應遲十五年

青龍寺早夏

塵埃經小雨地高倚長坡日西寺門外景氣含清和
澗有老僧立靜無凡客過殘鶯意思盡新葉陰涼多
春去來幾日夏雲忽嵯峩朝朝感時節年髣暗蹉跎
胡爲戀朝市不去歸烟蘿青山寸步地自問心如何

秋題牡丹藂

晚叢白露夕衰葉涼風朝紅艷久已歇碧芳今亦銷
幽人坐相對心事共蕭條

勸酒寄元九

薤葉有朝露槿枝無宿花君今亦如此促促生有涯
既不逐禪僧林下學楞伽又不隨道士山中煉丹砂
百年夜分半一歲春無多何不飲美酒胡然自悲嗟
俗號消愁藥神速無以加一杯駈世慮兩杯反天和
三杯即酩酊或笑任狂歌陶陶復兀兀吾孰知其他
况在名利途平生有風波深心藏陷穽巧言織網羅
舉目非不見不醉欲如何

曲江感秋

五年作

沙草新雨地坼柳涼風枝三年感秋思併在曲江池
早蟬已嘹唳晚荷復離披前秋去秋思一一生此時
昔人三十二秋興已云悲我今欲四十秋懷亦可知
歲月不虛設此身隨日衰暗老不自覺直到鬢成絲

酬張太祝晚秋臥病見寄

高才淹禮寺短羽翔禁林西街居處遠北闕官曹深
君病不來訪我忙難往尋差池終日別寥落經年心
露濕綠蕪地月寒紅樹陰况茲獨愁夕聞彼相思吟
上言歡笑阻下嗟時歲侵容衰晚牕鏡思苦秋絃琴
一章錦繡段八韻瓊瑤音何以報珍重慙無雙南金

立秋日曲江憶元九

下馬柳陰下獨上堤上行故人千萬里新蟬二兩聲

城中曲江水江上江陵城兩地新秋思應同此日情

早朝賀雪寄陳山人

長安盈尺雪早朝賀君喜將赴銀臺門始出新昌里
上堤馬蹄滑中路蟻燭死十里向北行寒風吹破耳
待漏午門外候對三殿重鬚鬢凍生冰衣裳冷如水
忽思仙遊谷暗謝陳居士暖覆褐裘眠日高應未起
初與元九別後忽夢見之及寤而書適至兼

寄桐花詩悵然感懷因以此寄元九初謫江陵

永壽寺中語新昌坊北分歸來數行淚悲事不悲君
悠悠藍田路自去無消息計君食宿程已過商山北
昨夜雲四散千里同月色曉來夢見君應是君相憶
夢中握君手問君意何如君言苦相憶無人可寄書

覺來未及說叩門聲
驚言是商州使送君書一封
枕上忽驚起顛倒着衣裳
開緘見手扎一紙十三行
上論遷謫心下說離別腸
心腸都未盡不暇叙炎涼
云作此書夜夜宿商州東
獨對孤燈坐陽城山館中
夜深作書畢山月向西斜
月前何所有一樹紫桐花
桐花半落時復道正相思
殷勤書背後兼寄桐花詩
桐花詩八韻思緒一何深
以我今朝意憶君此夜心
一章一遍讀一句十回吟
珍重八十字字字化為金

和元九悼往

感舊收
幽作

美人別君去自去無處尋
舊物零落盡此情安可任
唯有襜紗幌塵埃日夜侵
馨香與顏色不似舊時深
透影燈耿耿籠光月沉沉
中有孤眠客秋涼生夜衾

舊宅牡丹院新墳松木林
夢中咸陽淚覺後江陵心
含此隔年恨發爲中夜吟
無論君自感聞者欲沾巾
重到渭江舊居

舊居清渭曲開門當蔡渡
十年方一還幾欲迷歸路
追思昔日行感傷故游處
插柳作高林種桃成老樹
因驚成人者盡是舊童孺
試問舊老人半爲遶村墓
浮生同過客前後遞來去
白日如弄珠出入光不住
人物日改變舉目悲所遇
回念念我身安得不衰暮
朱顏銷不歇白髮生無數
唯有山門外三峰色如故

白髮

白髮知時節暗與我有期
今朝日陽裏梳落數莖絲
家人不慣見憫默爲我悲
我云何足怪此意爾不知

凡人年三十外壯中已衰但思寢食味已減二十時
況我年四十本來形貌羸書魔昏兩眼酒病沉四肢
親愛日零落在者仍別離身心久如此白髮生已遲
由來生老死三病長相隨除却念無生人間無藥治
下有獨立人年來四十一

秋日

池殘寥落水惚下悠揚日嫋嫋秋風多槐花半成實

將之饒州江浦夜泊

明月滿深浦愁人獨臥舟煩寃寢不得夏夜長於秋
苦乏衣食資遠爲江海游光陰坐遲暮鄉國行阻修
身病向鄱陽家貧寄徐州前事與後事豈堪心併憂
憂來起長望但見江水流雲樹藹蒼蒼烟波淡悠悠

故園迷處所一望堪白頭

思歸時初爲
校書郎

養無晨昏膳隱無伏膺資遂求及親祿僂俛來京師
薄俸未及親別家已經時冬積温席戀春違采蘭
夏至一陰生稍稍夕漏遲塊然抱愁者長夜獨先知
悠悠鄉關路夢去身不隨坐惜時節變蟬鳴槐花枝

冀城北原作

野色何莽蒼去聲秋聲亦蕭疎風吹黃埃起落日駸征
車何代此開國封疆百里餘古今不相待朝市無常
居昔人城邑中今變爲丘墟昔人墓田中今化爲里
閭廢興相催迫日月互居諸世變無遺風焉能知其
初行人千載後懷古空躊躇

客路感秋寄明準上人

日暮天地冷雨霽山河清長風從西來草木凝秋聲
已感歲倏忽復傷物凋零孰能不慙悽天時牽人情
借問空門子何法易修行使我忘得心不教煩惱生
游襄陽懷孟浩然

楚山碧岩岩漢水碧湯湯秀氣結成象孟氏之文章
今我諷遺文思人至其鄉清風無人繼日暮空襄陽
南望鹿門山藹若有餘芳舊隱不知處雲深對蒼蒼
秋暮西歸途中書情

耿耿旅燈下愁多常少眠思鄉貴早發發在雞鳴前
九月草木落平蕪連遠山秋陰和曙色萬木蒼蒼然
去秋偶東游今秋始西旋馬瘦裘囊破別家來二年

憶歸復愁歸歸無一囊錢心雖非蘭膏安得不自燃

秋懷

月出照北堂光華滿堦墀涼風從西至草木日夜衰
桐柳減陰綠蕙蘭消碧滋感物私自念我心亦如之
安得長少壯盛衰迫天時人生如石火爲樂長苦遲
別楊穎士盧克柔殷堯藩

倦鳥暮歸林浮雲晴歸山獨有行路子悠悠不知還
人生苦營營終日羣動間所務雖不同同歸於不閒
扁舟來楚鄉疋馬往秦關離憂繞心曲宛轉如循環
且持一杯酒聊以開愁顏

題贈定光上人

二十身出家四十心離塵得徑入大道乘此不退輪

一坐十五年林下秋復春春花與秋氣不感無情人
我來如有悟潛以心照身誤落聞見中憂喜傷形神
安得遺耳目冥然反天真

抵役駱口驛喜蕭侍御書至兼觀新詩吟諷

通宵因寄八韻

時為墊
屋射

日暮心無繆吏役正營營忽驚芳信至復與新詩并
是時天無雲山館有月明月下讀數遍風前吟一聲
一吟三四嘆聲盡有餘清雅哉君子文詠性不詠情
使我靈府中鄙恡不得生始知聽韶濩可使心和平

酬李少府曹長官舍見贈

低腰復歛手心體不遑安一落風塵下始知為吏難
公事與日長宦情隨歲闌惆悵青袍袖芸香無半棧
賴有李夫子此懷聊自寬兩心如止水彼此無波瀾
往往簿書暇相勸強為歡白馬晚踏雪綠觴春煖寒
戀月夜同宿愛山晴可看野性自相近不是為同官

留別

秋涼卷朝簾春煖撤夜衾雖是無情物欲別尚沉吟
况與有情別別隨情淺深二年歡笑意一旦東西心
獨留誠可念同行力不任前事詎能料後期諒難尋
唯有潺湲淚不惜共沾衿

曉別

曉鼓聲已半離筵坐難久請君斷腸歌送我和淚酒
月落欲明前馬嘶初別後浩浩暗塵中何由見回首

北園

北園東風起雜花次第開心知須臾落一日三四來
花下豈無酒欲酌復遲迴所思眇千里誰勸我一杯

惜栢李花

花細而繁色豔而黯亦花中之
有思者速衰易落故惜之耳

對小花鮮妍香繁條軟弱高低二三尺重疊千萬萼
朝艷靄霏霏夕凋紛漠漠辭枝朱粉細覆地紅銷薄
由來好顏色常苦易銷礫不見菑蕩花狂風吹不落

照鏡

皎皎青銅鏡班班白絲髻豈復更藏年實年君不信

新秋

西風飄一葉庭前颯已涼風池明月水衰蓮白露房
其奈江南夜絲絲自此長

夜雨

早蛩啼復歇殘燈滅又明隔牖知夜雨芭蕉先有聲

秋江送客

秋鴻次第過衰猿朝夕聞是日孤舟客此地亦離羣
濛濛潤衣雨漠漠冒帆雲不醉潯陽酒烟波愁殺人

感遊寄遠

寄通州元侍御果州崔員外
豐州李舍人鳳州李郎中

昨日聞甲死今朝聞乙死知識三分中二分化為鬼
逝者不復見悲哉長已矣存者今如何去我皆萬里
平生知心者屈指能有幾通果豐鳳州眇然四君子
相思俱老大浮世如流水應嘆舊交遊凋零日如此
何當一杯酒開眼笑相視

秋月

夜初色蒼然夜深光浩然稍轉西廊下漸滿南牕前

况是綠蕪地復茲清露天落葉聲策策驚鳥影翩翩
棲禽尚不穩愁人安可眠

白氏文集卷第九

白氏文集卷第十

感傷二古調詩五言
凡七十八首

朱陳村

徐州古澧縣有村曰朱陳去縣百餘里桑麻青氤氳
機梭聲札札牛驢走紆紆女汲澗中水男採山上薪
縣遠官事少山深人俗淳有財不行商有丁不入軍
家家守村業頭白不出門生爲陳村民死爲陳村塵
田中老與幼相見何欣欣一村唯兩姓世世爲婚姻
其村唯朱陳
二姓而已親踈居有族少長游有羣黃雞與白酒
歡會不隔旬生者不遠別嫁娶先近鄰死者不遠葬
墳墓多遶村旣安生與死不苦形與神所以多壽考
往往見玄孫我生禮義鄉少小孤且貧徒學辨是非

祗自取辛勤世法貴名教士人重官婚以此自桎梏
信爲大謬人十歲解讀書十五能屬文二十舉秀才
三十爲諫臣下有妻子累上有君親恩承家與事國
望此不肖身憶昨旅遊初迨今十五春孤舟三適楚
羸馬四經秦晝行有饑色夜寢無安寃東西不暫住
來往若浮雲離亂失故鄉骨肉多散分江南與江北
客有平生親平生終日別近者隔年聞朝憂卧至暮
夕哭坐達晨悲火燒心曲愁霜侵鬢根一生苦如此
長羨陳村民

讀鄧舫詩

塵架多文集偶取一卷披未及看姓名疑是陶潛詩
看名知是君惻惻令我悲詩人多蹇厄近日誠有之
京兆杜子美猶得一拾遺襄陽子孟浩然亦聞鬢成絲
嗟君兩不如三十在布衣擢第祿不及新婚妻未歸
少年無疾患溘死於路岐天不與爵壽唯與好文詞
此理勿復道巧曆不能推

寄元九

晨雞纔發聲夕雀俄斂翼晝夜往復來疾如出入息
非徒改年貌漸覺無心力自念因念君俱爲老所逼
君年雖校少顛顛謫南國三年不放歸炎瘴消顏色
山無殺草霜水有含沙蜮健否遠不知書多隔年得
願君少愁苦我亦加飡食各保金石軀以慰長相憶

秋夕

葉聲落如雨月色白似霜夜深方獨卧誰爲拂塵牀

夜雨

我有所念人隔在遠遠鄉我有所感事結在深深腸
鄉遠去不得無日不瞻望腸深解不得無夕不思量
況此殘燈夜獨宿在空堂秋天殊未曉風雨正蒼蒼
不學頭陀法前心安可忘

秋霽

金火不相待炎涼雨中變林晴有殘蟬巢冷無留燕
沉吟卷長簾愴惻收團扇向夕稍無泥閒步青苔院
月出砧杵動家家擣秋練獨對多病妻不能理針線
冬衣殊未製夏服行將綻何以迎早秋一杯聊自勸

嘆老三首

晨興照青鏡形影兩寂寞少年辭我去白髮隨梳落
萬化成於漸漸衰看不覺但恐鏡中顏今朝老於昨
人年少滿百不得長歡樂誰謂天地心千齡與龜鶴
吾聞善醫者今古稱扁鵲萬病皆可治唯無治老藥

二

我有一握髮梳理何稠直昔似玄雲光今如素絲色
匣中有舊鏡欲照先嘆息自從頭白來不欲明磨拭
鷓頭與鶴頸至老常如墨獨有人髻毛不得終身黑

三

前年種桃核今歲成花樹去歲新嬰兒今年已學步
但驚物長成不覺身衰暮去矣欲何如少年留不住
因書今日意徧寄諸親故壯歲不歡娛長年當悔悟
送兄弟回雪夜

日晦雲氣黃東北風切切時從村南還新與兄弟別
離襟淚猶濕迴馬嘶未歇欲歸一室坐天陰多無月
夜長火消盡歲暮雨凝結寂寞滿爐灰飄零上堦雪
對雪畫寒灰殘燈明復滅灰死如我心雪白如我髮
所遇皆如此頃刻堪愁絕迴念入坐忘轉憂作禪悅
平生洗心法正爲今宵設

溪中早春

南山雪未盡陰嶺留殘白西澗冰已消春溜含新碧
東風來幾日蟄動萌草拆潛知陽和功一日不虛擲
愛此天氣暖來拂溪邊石一坐欲忘歸暮禽聲嘖嘖
蓬蒿隔桑棗隱映烟火夕歸來問夜食家人烹薺麥

同友人尋澗花

聞有澗底花貫得村中酒與君來校遲已逢搖落後
臨觴有遺恨悵望空溪口記取花發時期君重携手
我生日日老春色年年有且作來歲期未知身健否

登村東古塚

高低古時塚上有牛羊道獨立最高頭悠哉此懷抱
回頭向村望但見荒田草村人不愛花多種粟與棗
自來此村住不覺風光好花少鶯亦稀年年春暗老

夢裴相公

五年生死隔一夕寃夢通夢中如往日同直金鑾宮
髣髴金紫色分明冰玉容勤勤相眷意亦與平生同
既寤知是夢惘然情未終追想當時事何殊昨夜中
自我學心法萬緣成一空今朝爲君子流淚一沾曾

書寢

坐整白單衣起穿黃草履朝食盥漱畢徐下堦前步
暑風微變候晝刻漸加數院靜地陰陰鳥鳴新葉對
獨行還獨臥夏景殊未暮不作午時眠日長安可度

別行簡

漠漠病眼花星星愁鬢雪筋骸已衰憊形影仍分訣
梓州二千里劍門五六月豈是遠行時火雲燒棧熱
何言巾上淚乃是腸中血念此早歸來莫作經年別

觀兒戲

齟齬七八歲綺紈三四兒弄塵復鬪草盡日樂嬉嬉
堂上長年客髻間新有絲一看竹馬戲每憶童騃時
童騃饒戲樂老大多憂悲靜念彼與此不知誰是癡

嘆常生

西村常氏子臥疾不須臾前旬猶訪我今日忽云徂
時我病多暇與之同野居園林青藜藹相去數里餘
村鄰無好客所遇唯農夫之子如何者往還猶勝無
于今亦已矣可爲一長吁

寄元九

一病經四年親朋書信斷窮通各易交自笑知何晚
元君在荆楚去日唯云遠彼獨似何人心如石不轉
憂我貧病身書來唯勸勉上言少愁苦下道加食飯
恰君爲謫吏窮薄家貧福三寄衣食資數盈二十萬
豈是貪衣食感君心纏繞念我口中食分君身上暖
不因身病久不因命多蹇平生親友心豈得知深淺

以鏡贈別

人言似明月我道勝明月明月非不明一年十二缺
豈如玉匣裡如水常清徹月破天暗時圓明獨不歇
我慙貌醜老繞髻班班雪不如贈少年迴照青絲髮
因君千里去持此將爲別

城上對月期友人不至

古人惜晝短勸令秉燭遊况此迢迢夜明月滿西樓
復有樽中酒置在城上頭期君君不至人月兩悠悠
照水烟波白照人肌髮秋清光正如此不醉即須愁

念金鑿子二首

衰病四十身嬌癡三歲女非男猶勝無慰情時一撫
一朝捨我去魂影無處所况念天札時嘔啞初學語
始知骨肉愛乃是憂悲聚唯思未有前以理遣傷苦
忘懷日已久三度移寒暑今日一傷心因逢舊乳母

二

與爾爲父子八十有六旬忽然又不見邇來三四春
形質本非實氣聚偶成身恩愛元是妄緣合暫爲親
念茲庶有悟聊用遣悲辛暫將理自奪不是忘情人

對酒

人生一百歲通計三萬日何況百歲人人間百無一
賢愚共零落貴賤同理沒東岱前後竟北邙新舊骨
復聞藥誤者爲愛長生術又有憂死者爲貪政事筆
藥誤不得老憂死非因疾誰言人靈知得不知失
何如會親友飲此杯中物能沃煩慮消能陶真性出

所以劉阮輩終年醉兀兀

渭村雨歸

渭水寒漸落離離蒲稗苗間傷沙邊立看人刈葦蒼
近水風景冷晴明猶寂寂復茲夕陰起野思重蕭條
蕭條獨歸路暮雨濕村橋

諭懷

黑頭日已白白面日已黑人生未死間變化何終極
常言在已者莫若形與色一朝改變來止遏不能得
况彼身外事悠悠通與塞

喜友至留宿

村中少賓客柴門多不開忽聞車馬至云是故人來
况值風雨夕愁心正悠悠哉願君且同宿盡此手中杯

人生開口笑百年都幾回

西原晚望

花菊引間步行上西原路原上晚無人因高聊四顧
南陌有烟火北陌連墟墓村鄰何蕭條近者無百步
吾廬在其下寂寞風日暮門外轉枯蓬籬根伏寒兔
故園汴水上離亂不堪去近歲始移家飄然此村住
新屋五六間古槐八九樹便是衰病身此身終老處

感鏡

美人與我別留鏡在匣中自從花顏去秋水無芙蓉
經年不開匣紅埃覆青銅今朝一拂拭自顧顛顛容
照罷重惆悵背後雙盤龍

村居臥病三首

戚戚抱羸病悠悠度朝暮夏木纔結陰秋蘭已含露
前日巢中卵化為雛飛去昨日穴中虫蛻為蟬上樹
四時未常歇一物不暫住唯有病客心沉然獨如故

二

新秋久病客起步村南道盡日不逢人虫聲徧荒草
西風吹白露野綠秋仍早草木猶未傷先傷我懷抱
朱顏與玄鬢強健幾時好况為憂病侵不得依年老

三

種黍三十畝雨來苗漸大種薤二十畦秋來欲堪刈
望黍作冬酒留薤為春菜荒村百物無待此養衰瘵
葺廬備陰雨補褐防寒歲病身知幾時且作明年計

沐浴

經年不沐浴塵垢滿肌膚今朝一澡濯衰瘦頗有餘
老色頭鬢白病形肢體虛衣寬有賸帶髮少不勝梳
自問今年幾春秋四十初四十已如此七十復何如

栽松二首

小松未盈尺心愛手自移蒼然澗底色雲濕烟霏霏
栽植我年晚長成君性遲如何過四十種此數寸株
得見成陰否人生七十稀

二

愛君抱晚節憐君含直文欲得朝朝見堦前故種君
知君死則已不死會凌雲

病中友人相訪

臥久不記日南牕昏復昏蕭條草簷下寒雀朝夕聞

強扶牀前杖起向庭中行偶逢故人至便當一逢迎
移榻就斜日披裘倚前楹閒談勝服藥稍覺有心情

自覺二首

四十未爲老憂傷早衰惡前歲二毛生今年一齒落
形骸日損耗心事同蕭索夜寢與朝飡其間味亦薄
同歲崔舍人容光方灼灼始知年與貌衰盛隨憂樂
畏老老轉逼憂病病彌縛不畏復不憂是除老病藥

二

朝哭心所愛暮哭心所親親愛零落盡安用身獨存
幾許平生歡無限骨肉恩結爲腸間痛聚作鼻頭辛
悲來四肢緩泣盡雙眸昏所以年四十心如七十人
我聞浮圖教中有解脫門置心爲止水視身如浮雲

抖擻垢穢衣度脫生死輪胡爲戀此苦不去猶逡巡
回念發弘願願此見在身但受過去報不結將來因
誓以智慧水永洗煩惱塵不將恩愛子更種悲憂根

夜雨有念

以道治心氣終歲得晏然何乃戚戚意忽來風雨天
旣非慕榮顯又不恤飢寒胡爲苦不樂抱膝殘燈前
形影暗相問心默對以言骨肉能幾人各在天一端
吾兄寄宿州吾弟客東川南北五千里吾身在中間
欲去病未能欲任心不安有如波上舟此縛而彼牽
自我向道來于今六七年鍊成不二性瀟盡萬千緣
唯有恩愛火往往猶熬煎豈是藥無効病多難盡蠲

寄楊六

楊攝萬年縣尉
予爲贊善大夫

青宮官冷靜赤縣事繁劇一間復一忙動作經時隔
清觴久未酌白日頓虛擲念此忽踟躕悄然心不適
豈無舊交結久別或遷易亦有新往還相見多形迹
唯君於我分堅久如金石何況老大來人情重姻戚
會稀歲月急此事真可惜幾回開口笑便到髭鬚白
公門苦鞅掌盡日無間隙猶與乘暝來靜言同一夕

送春

三月三十日春歸日復暮惆悵問春風明朝應不住
送春曲江上眷眷東西顧但見撲水花紛紛不知數
人生似行客兩足無停步日日進前程前程幾多路
兵刀與水火盡可違之去唯有老到來人間無避處
感時良爲已獨倚池南對今日送春心心如別親故

哭李三

去年渭水曲秋時訪我來今年常樂里春日哭君回
哭君仰問天天意安在哉若必奪其壽何如不與才
落然身後事妻病女嬰孩

別李十一後重寄

自此後詩在
江州路上作

秋日正蕭條驅車出蓬葦回望青門道目極心鬱鬱
豈獨戀鄉土非關慕簪紱所愴別李君平生同道術
俱承金馬詔聯秉諫臣筆共上青雲梯中途一相失
江湖我方往朝廷君不出蕙帶與華簪相逢是何日

初出藍田路作

停驂問前路路在秋雲裏蒼蒼縣南道去途從此始
絕頂忽盤上衆山皆下視下視千萬峰峰頭如浪起

朝經韓公坂夕次藍橋水潯陽僅四千始行七十里
人煩馬蹄阻勞苦已如此

仙娥峰下作

我爲東南行始登商山道商山無數峰最愛仙娥好
差參對若插匝雲如抱渴望寒玉泉香聞紫芝草
青崖屏削碧白石牀鋪縞向無如此物安足留四皓
感彼私自問歸山何不早可能塵土中還隨衆人老

微雨夜行

漠漠秋雲起悄悄夜寒生但覺衣裳濕無默亦無聲
再到襄陽訪問舊居

昔到襄陽日髣髴初有髭今過襄陽日髭髻半成絲
舊遊都是夢乍到忽如歸東郭蓬蒿宅荒涼今屬誰
故知多零落間井亦遷移獨有秋江水烟波似舊時

寄微之三首

江州望通州天涯與地末有山萬丈高有江千里闊
間之以雲霧飛鳥不可越誰知千古險爲我二人設
通州君初到鬱鬱愁如結江州我方去迢迢行未歇
道路日乖隔音信日斷絕因風欲寄語地遠聲不徹
生當復相逢死當從此別

二

吾遊襄陽日我在長安住君今在通州我過襄陽去
襄陽九里郭樓雉連雲對顧此稍依依是君舊遊處
蒼茫蒹葭水中有潯陽路此去更相思江西少親故

三

去國日已遠喜逢物似人如何會此意江上坐思君
有如河嶽氣相合方氛氲狂風吹中絕兩處成孤雲
風迴終有時雲合豈無因努力各自愛窮通我爾身
喜逢一作稀逢

舟中雨夜

江雲暗悠悠江風冷修修夜雨滴船背夜浪打船頭
船中有病客左降向江州

夜聞歌者

宿鄂州

夜泊鸚鵡洲秋江月澄徹鄰船有歌者發調堪愁絕
歌罷繼以泣泣聲通復咽尋聲見其人有婦顏如雪
獨倚帆檣立娉婷十七八夜淚似真珠雙雙墮明月
借問誰家婦歌泣何凄切一問一沾襟低眉終不語

江樓聞砧

江州作

江人授衣晚十月始聞砧一夕高樓月萬里故園心

宿東林寺

經牕燈焰短僧爐火氣深索落廬山夜風雪宿東林

憶洛下故園

時淮汝寇戎未滅

潯陽遷謫地洛陽離亂年烟塵三川上炎瘴九江邊
鄉心坐如此秋風仍颯然

贈別崔五

朝送南去客暮迎北來賓孰云當大路少遇心所親
勞者念息肩熱者思濯身何如獨愁日忽見平生人
平生已不淺是日重殷勤問從何處來及此江亭春
江天春多雲夜月隔重陰移樽對間飲燈照花紛紛

一會不易得餘事何足云
明日又分手今夕且歡忻
春晚寄微之

三月江水闊悠悠桃花波年芳與心事此地兩蹉跎
南國方譴謫中原正兵戈眼前故人少頭上白髮多
通州更迢遞春盡復如何

漸老

今朝復明日不覺年齒暮白髮逐梳落朱顏辭鏡去
當春頗愁寂對酒寡歡趣遇境多愴辛逢人益敦故
形質屬天地推遷從不住所怪少年心銷磨落何處

送幼史

淮右寇未散江西歲再徂故里干戈地行人風雪途
此時與爾別江畔立踟躕

夜雪

已訝衾枕冷復見牕戶明夜深知雪重時聞折竹聲
寄行簡

鬱鬱眉多斂默默口寡言豈是願如此舉目誰與歡
去春爾西征從事巴蜀間今春我南謫抱疾江海壖
相去六千里地絕天邈然十書九不達何以開憂顏
渴人多夢飲饑人多夢食春來夢何處合眼到東川

首夏

孟夏百物滋動植一時好麋鹿樂深林
蛭蛇喜豐草翔禽愛密葉游鱗悅新藻
天和遺漏處而我獨枯槁
一身在天末骨肉皆遠道
舊國無來人寇戎塵浩浩
憂沉竟何益祗自勞
懷抱不如放身心冥然任天造

潯陽多美酒可使杯不燥
湓魚賤如泥烹炙無昏早
朝飯山下寺暮醉湖中島
何必歸故鄉茲焉可終老

孟夏思渭村舊居寄舍弟

嘖嘖雀引雛稍稍筍成竹
時物感人情思我故鄉曲
故園渭水上十載事樵牧
手種榆柳成陰陰覆墻屋
兔隱荳苗肥鳥鳴桑椹熟
前年當此時與爾同遊矚
詩書課弟姪農圃資童僕
日暮麥登場天晴蚕拆簇
弄泉南澗坐待月東亭
宿興發飲數杯悶來棊一局
一朝忽分散萬里仍羈束
井鮒思反泉籠鶯悔出谷
九江地卑濕四月天炎燠
苦雨初入梅瘴雲稍含毒
泥秧水畦稻灰種畝田粟已訝殊
歲時仍嗟異風俗
閒登郡樓望日落江山綠
歸雁拂鄉心平湖斷人目

殊方我漂泊舊里君幽獨
何時同一瓢飲水心亦足

早蟬

六月初七日江頭蟬始鳴
石楠深葉裏薄暮兩三聲
一催衰鬢色再改故園情
西風殊未起秋思先秋生
憶昔在東掖宮槐花下聽
今朝無限思雲對遶湓城

感情

中庭曬服玩忽見故鄉履
昔贈我者誰東鄰嬋娟子
因思贈時語特用結終始
永願如履綦雙行復雙止
自吾謫江郡漂蕩三千里
爲感長情人提携同到此
今朝一惆悵反覆看未已
人隻履猶雙何曾得相似
可嗟復可惜錦表繡爲裡
況經梅雨來色黯花草死

南湖晚秋

八月白露降湖中水方老旦夕秋風多衰荷半傾倒
手攀青楓樹足蹋黃蘆草慘淡老容顏零落秋懷抱
有兄在淮楚有弟在蜀道萬里何時來烟波白浩浩
郡廳有對晚榮早凋人不識名因題其上
潯陽郡廳後有對不知名秋先梧桐落春後桃李榮
五月始榮動八月已凋零左右皆松桂四時鬱青青
豈量雨露恩沾濡不均平榮枯各有分天地本無情
我亦相類早衰向晚成形骸少多病三十不豐盈
毛鬢早改變四十白髭生誰教兩蕭索相對此江城

感秋懷微之

葉下湖有波秋風此時至誰知濩落心先納蕭條氣
推移感時歲漂泊思同志昔爲烟霞侶今作泥塗吏

白鷗毛羽弱青鳳文章異各開一籠中歲晚同顛顛
因沐感髮寄朗上人二首

年長身轉慵百事無所欲乃至頭上髮經年方一沐
沐稀髮苦落一沐仍半禿短髻經霜蓬老面辭春木
強年過猶近衰相來何速應是煩惱多心焦血不足

二

漸少不滿把漸短不盈尺況茲短少中日夜落復白
既無神仙術何除老死籍祗有解脫門能度衰苦厄
掩鏡望東寺降心謝禪客衰白何足言剃落猶不惜

早蟬

月出先照山風生先動水亦如早蟬聲先入聞人耳
一聞愁意結再聽鄉心起渭上新蟬聲先聽渾相似

衡門有誰聽日暮槐花裏

苦熱喜涼

經時苦炎熱心體但煩倦白日一何長清秋不可見
歲功成者去天數極則變潛知寒燠間遷次如乘傳
火雲忽朝斂金風俄夕扇簟枕遂清涼筋骸稍康健
因思望月侶好卜迎秋宴竟夜無客來引杯還自勸

早秋晚望兼呈韋侍郎

九派繞孤城城高生遠思人烟半在船野水多於地
穿霞日脚直驅鴈風頭利去國來幾時江上秋三至
夫君亦淪落此地同漂寄憫然向隅心摧頽觸籠翅
且謀眼前計莫問曾中事潯陽酒甚濃相勸時時醉

司馬宅

雨徑綠蕪合霜園紅葉多蕭條司馬宅門巷無人過
唯對大江水秋風朝夕波

司馬廳獨宿

荒涼滿庭草偃亞侵簷竹府吏下廳簾家僮開被幙
數聲城上漏一點牕前燭官曹冷侶冰誰肯來同宿
夢與李七庾三十三同訪元九

夜夢歸長安見我故親友損之在我左順之在我右
云是二月天春風出携手同過靖安里下馬尋元九
元九正獨坐見我笑開口還指西院花仍開北亭酒
如言各有故侶惜歡難久神合俄頃間神離欠伸後
覺來疑在側求索無所有殘燈影閃墻斜月光穿牖
天明西北望萬里君知否老去無見期踟躕搔白首

秋槿

風露颯已冷天色亦黃昏中庭有槿花榮落同一晨
秋開已寂寞夕殞何紛紛正怜少顏色復嘆不逡巡
感此因念彼懷哉聊一陳男兒老富貴女子晚婚姻
頭白始得志色衰方事人後時不獲已安得如青春

荅元郎中楊貞外喜鳥見寄四十四字成

南宮鴛鴦地何忽鳥來止故人錦帳郎聞鳥笑相視
疑鳥報消息望我歸鄉里我歸應待鳥頭白慙愧元
郎誤歡喜

白氏文集卷第十

白氏文集卷第十一

感傷三古體五言凡五十三首

初入峽有感

上有萬仞山下有千丈水蒼蒼兩崖間闊狹容一葦
瞿塘呀直瀉灩澦屹中峙未夜黑岩昏無風白浪起
大石如刀劍小石如牙齒一步不可行況千三百里
自峽州至忠州艱險相繼凡一千三百里苒蕩竹篾音欹危音楫師趾一
跌無完舟吾生繫於此常聞仗音信蠻貊可行矣自
古漂流人豈盡非君子況吾時與命蹇舛不足恃常
恐不才身復作無名死

過昭君村村在歸州東北四十里

靈珠產無種彩雲出無根亦如彼妹子生此遐陋村

至麗物難掩遽選入君門獨美衆所嫉終棄如塞垣
唯此希代色豈無一顧恩事排勢須去不得由至尊
白黑既可變丹青何足論竟埋代北骨不返巴東魂
慘淡晚雲水依稀舊鄉園妍姿化已久但有村名存
村中有遺老指點爲我言不取往者戒恐貽來者冤
至今村女面燒灼成癍痕

自江州至忠州

前在潯陽日已嘆賓朋寡忽忽抱憂懷出門無處寫
今來轉深僻窮峽巔山下五月斷行舟艷堆正如馬
巴人類猿狖矍鑠滿山野敢望見交親喜逢似人者
初到忠州登東樓寄萬州楊八使君

山東邑居窄峽牽氣候徧林巒少平地霧雨多陰天
隱隱煮鹽火漠漠燒畚烟賴此東樓夕風月得翛然
平軒望所思目斷心涓涓背春有去鴈上水無來船
我懷巴東守乃是關西賢平生已不淺流落重相怜
水梗漂萬里籠禽囚五年新恩同雨露遠郡鄰山川
書信雖往復封疆徒接連其如美人面欲見杳無緣

郡中

鄉路音信斷山城日月遲欲知州近遠堦前摘荔枝
西樓夜

悄悄復悄悄城隅隱林杪山郭燈火稀峽天星漢少
年光東流水生計南枝鳥月沒光沉沉西樓殊未曉

東樓曉

脉脉復脉脉東樓無宿客城暗雲霧多峽深田地窄

宵燈尚留焰晨禽初展翮欲知山高低不見東方白

寄王質夫

憶始識君時愛君世緣薄我亦吏王畿不為名利著
春尋仙遊洞秋上雲居閣樓觀水潺潺龍潭花漠漠
吟詩石上坐引酒泉邊酌因話出處心心期老岩壑
忽從風雨別遂被簪纓縛君作出山雲我為入籠鶴
籠深鶴憔悴山遠雲飄泊去處雖不同同負平生約
今來各何在老去隨所托我守巴南城君佐征西幕
年顏漸衰颯生計仍蕭索方含去國愁且羨從君樂
舊遊疑是夢往事思如昨相憶春又深故山花正落

南賓郡齋即事寄楊萬州

山上巴子城山下巴江水中窮獨人強名為刺史

時時竊自哂刺史豈如是倉粟餒家人黃練裹妻子

忠州刺史已下悉以金每苔翳冠帶霧雨靈樓雉衙

田粟給祿食黃絹支俸鼓暮復朝郡齋臥還起回首望南浦亦在烟波裏而

我復何嗟夫君猶滯此

招蕭處士

峽內豈無人所逢非所思門前亦有客相對不相知
仰望但雲對俯顧惟妻兒寢食起居外端然無所為
東郊蕭處士聊可與開眉能飲滿杯酒善吟長句詩
庭前吏散後江畔路乾時請君携竹杖一赴郡齋期

庭槐

南方饒竹對唯有青槐稀十種七八死縱活亦枝離
何此郡庭下一株獨華滋蒙蒙碧烟葉嫋嫋黃花枝

我家渭水上此對蔭前墀忽向天涯見憶在故園時
人生有情感遇物牽所思對木猶復爾況見舊親知

送客回晚興

城上雲霧開沙頭風浪定參差亂山出淡泞平江淨
行客舟已遠居人酒初醒嫋嫋秋竹梢巴蟬聲似磬

東樓竹

瀟灑城東樓遶樓多修竹森然一萬竿白粉封青玉
捲簾睡初覺欹枕看未足影轉色入樓牀席生浮綠
空城絕賓客向夕彌幽獨樓上夜不歸此君留我宿

九日登巴臺

黍香酒初熟菊暖花未開閒聽竹枝曲淺酌茱萸杯
去年重陽日漂泊溢城隈今歲重陽日蕭條巴子臺

旅鬢尋已白鄉書久不來臨觴一搔首座客亦徘徊

東城尋春

老色日上面歡情日去心今既不如昔後當不如今
今猶未甚衰每事力可任花時仍愛出酒後尚能吟
但恐如此興亦隨日消沉東城春欲老勉強一來尋

江上送客

江花已萎絕江草已消歇遠客何處歸孤舟今日發
杜鵑聲似哭湘竹班如血共是多感人仍爲此中別

桐花

春令有常候清明桐始發何此巴峽中桐花開十月
豈伊物理變信是土宜別地氣反寒暄天時倒生殺
草木堅強物所稟固難奪風候一參差榮枯遂乖刺

況吾北人性不耐南方熱強羸壽天間安得依時節
早祭風伯因懷李十一舍人

遠郡雖褊陋時祀奉朝經夙興祭風伯天氣曉冥冥
導騎與從吏引我出東垆水霧重如雨山火高於星
忽憶早朝日與君趨紫庭步登龍尾道却望終南青
一別身向老所思心未寧至今想在耳玉音尚玲玲

花下對酒二首

藹藹江氣春南賓閨正月梅櫻與桃杏次第城上發
紅房爛簇火素艷紛圍雪香惜委風飄愁牽壓枝折
樓中老太守頭上新白髮冷淡病心情暄和好時節
故園音信斷遠郡親賓絕欲問花前樽依然爲誰設

二

引手攀紅櫻紅櫻落似霰仰首看白日白日走如箭
年芳與時景頃刻猶衰變況是血肉身安能長強健
人心苦迷執慕貴憂貧賤愁色常在眉歡容不上面
況吾頭半白把鏡非不見何必花下杯更待他人勸

不二門

兩眼日將闔四肢漸衰瘦束帶賸昔圍穿衣妨去聲寬
袖流年似江水奔注無昏晝志氣與形骸安得長依
舊亦曾登玉陛舉措多紕繆至今金闕籍名姓獨遺
漏亦曾燒大藥消息垂火候至今殘丹砂燒乾不成
就行藏事兩失憂惱心交鬪化作顛顛翁拋身在荒
陋坐看老病逼須得醫王救唯有不二門其間無夭
壽

我身

我身何所似似彼孤生蓬秋霜剪根斷浩浩隨長風
昔於秦雍間今落巴蠻中昔爲意氣郎今作寂寞翁
外貌雖寂寞中懷頗冲融賦命有厚薄委心任窮通
通當爲大鵬舉翅摩蒼穹窮則爲鷦鷯一枝足自容
苟知此道者身窮心不窮

哭王質夫

仙遊寺前別別來十年餘生別猶怏怏死別復何如
客從梓潼來道君死不虛驚疑心未信欲哭復踟躕
踟躕寢門側聲發淚亦俱衣上今日淚篋中前月書
伶君古人風重有君子儒篇詠陶謝輩風衿嵇阮徒
出身旣蹇迤生世仍須臾誠知天至高安得不一呼
江南有毒蟒江北有妖狐皆享千年壽多於王質夫
不知彼何德不識此何辜

東坡種花二首

持錢買花對城東坡上栽但構有花者不限桃杏梅
百果叅雜種千枝次第開天時有早晚地力無高低
紅者霞艷艷白者雪皚皚遊蜂遂不去好鳥亦栖來
前有長流水下有小平臺時拂臺上石一舉風前杯
花枝蔭我頭花蕊落我懷獨酌復獨詠不覺月平西
巴俗不愛花竟春無人來唯此醉太守盡日不能迴

二

東坡春向暮對木今何如漠漠花落盡翳翳葉生初
每日領童僕荷鋤仍決渠剗土壅其本引泉漑其枯

小對低數尺大對長丈餘封植未幾時高下齊扶踈
養對既如此養民亦何殊將欲茂枝葉必先救根株
云何救根株勸農均賦租云何茂枝葉省事寬刑書
移此爲郡政庶幾甦俗蘓

登城東古臺

迢迢東郊上有土青崔嵬不知何代物疑是巴王臺
巴歌久無聲巴宮沒黃埃靡靡春草合牛羊緣四隈
我未一登眺目極心悠哉始見江山勢峰壘水環迴
憑高視聽曠向遠曾襟開唯有故園念時從東北來
哭諸故人因寄元九

昨日哭寢門今日哭寢門借問所哭誰無非故交親
偉卿既長往質夫亦幽淪屈指數年世收涕自思身
彼皆少於我先爲泉下人我今頭半白焉得身久存
好懷元郎中相識二十春昔見君生子今聞君抱孫
存者盡老大逝者已成塵早晚升平宅開眉一見君

郡中春宴因贈諸客

僕本儒家子待詔金馬門忝塵親近地孤負聖明恩
一旦奉優詔萬里牧遠人可憐島夷帥自稱爲使君
身騎牂牁馬口食塗江鱗闇淡緋衫故爛班白髮新
是時歲二月玉曆布春分頒條示皇澤命宴及良辰
冉冉趨府吏蚩蚩聚州民有如蟄虫鳥亦應天地春
薰草席鋪座藤枝酒注樽中庭無平地高下隨所陳
鼗鼓聲坎坎巴女舞蹲蹲使君居上頭掩口語衆賓
勿笑風俗陋勿欺官府貧蜂巢與蟻穴隨分有君臣

關元寺東池早春

池水暖溫暎水清波歛灩簇簇青泥中新蒲葉如劍
梅房小白裏柳彩輕黃染順氣草薰薰適情鷗汎汎
舊遊成夢寐往事隨陽焱芳物感幽懷一動平生念

東澗種柳

野性愛栽植植柳水中坻乘春持斧斫截而對之
長短旣不一高下隨所宜倚岬埋大幹臨流挿小枝
松栢不可待梗柶固難移不如種此對此對易榮滋
無根亦可活成陰況非遲三年未離郡可以見依依
種罷水邊憇仰頭閒自思富貴本非望功名須待時
不種東溪柳端坐欲何爲

臥小齋

朝起視事畢晏坐飽食終散步長廊下退臥小齋中
拙政自多暇幽情誰與同孰云二千石心如田野翁
步東坡

朝上東坡步夕上東坡步東坡何所愛愛此新成對
種植當歲初滋榮及春暮信意取次栽無行亦無數
綠陰斜景轉芳氣微風度新葉鳥下來菱花蝶飛去
閒携班竹杖徐曳黃麻屨欲識往來頻青苔成白路
徵秋稅畢題郡南亭

高城直下視蠢蠢見巴蠻安可施政教尚不通語言
且喜賦斂畢幸聞閭井安豈伊循良化賴此豐登年
按牘旣簡少池館亦清閒秋雨簷果落夕鍾林鳥還
南亭日瀟洒偃臥恣踈頑

蚊蟆

巴徼炎毒早二月蚊蟆生啞膚拂不去遶耳薨薨聲
斯物頗微細中人初甚輕如有膚受諸久則瘡疔成
疔成無奈何所要防其萌麼虫何足道潛諭傲人情
登龍昌上寺望江南山懷錢舍人

騎馬出西郭悠悠欲何之獨上高寺去一與白雲期

虛檻晚瀟洒前山碧參差忽似青龍閣同望玉峰時

因詠松雪句永懷鸞鶴姿六年不相見况乃隔榮衰

昔常與錢舍人登青龍寺上方同望藍田山閣
有絕句云偶來上寺因高望松雪分明見舊山

郊下

西日照高樹對頭子規鳴東風吹野水水畔江籬生
盡日看山立有時尋澗行兀兀長如此何許似專城

遣懷

樂往必悲生秦來猶否極誰言此數然吾道何終塞
嘗求詹尹卜拂龜竟默默亦曾仰問天天但蒼蒼色
自茲唯委命名利心雙息近日轉安閒鄉園亦休憶
回看世間苦苦在求不得我今無所求庶離憂悲域

歲晚

霜降水返壑風落木歸山冉冉歲將晏物皆復本源
何此南遷客五年獨未還命途分已定日久心彌安
亦嘗心與口靜念私自言去國固非樂歸鄉未必歡
何須自生苦捨易求其難

負冬日

杲杲冬日出照我屋南隅負暄閉目坐和氣生肌膚

初似飲醇醪又如蟄者蘓外融百骸暢中適一念無
曠然忘所在心與虛空俱

委順

山城雖荒蕪竹對有嘉色郡俸誠不多亦足充衣食
外累由心起心寧累自息尚欲忘家鄉誰能算官職
宜懷齊遠近委順隨南北歸去誠可憐天涯任亦得

宿溪翁

時初除郎官赴朝

衆心愛金玉衆口貪酒肉何此溪上翁飲瓢亦自足
溪南刈薪草溪北脩墻屋歲種一頃田春驅兩黃犢
於中甚安適此外無營欲溪畔偶相逢菴中遂同宿
辭翁向朝市問我何官祿虛言笑殺翁郎官應列宿
重過壽泉憶與楊九別時因題店壁

商州南十里有水名壽泉湧出石崖下流經山店
憶昔相送日我去君言還寒波與老淚此地共潺湲
一去歷萬里再來經六年形容已變改處所猶依然
他日君過此殷勤吟此篇

西掖早秋直夜書意

自此後中書舍人時作

涼風起禁掖新月生宮沼夜半秋暗來萬年枝嫋嫋
炎涼迤時節鐘鼓交昏曉遇聖惜年衰報恩愁力小
素飡無補益朱綬虛纏繞冠蓋栖野雲稻梁養山鳥
量力私自省所得已非少五品不為賤五十不為夭
若無知足心貪求何日了

庭松

堂下何所有十松當我階亂立無行次高下亦不齊

高者三丈長下者十尺低有如野生物不知何人栽
接以青瓦屋承之白沙臺朝昏有風月燥濕無塵泥
踈韻秋槭槭涼陰夏淒淒春深微雨夕滿葉珠叢叢
歲暮大雪天壓枝玉皚皚四時各有趣萬木非其儕
去年買此宅多爲人所哈一家二十口移轉就松來
移來有何得但得煩襟開即此是益友豈必交賢才
顧我猶俗士冠蓋走塵埃未稱爲松主時時一愧懷

竹牕

常愛輞川寺竹牕東北廊一別十餘載見竹未曾忘
今春二月初卜居在新昌未暇作廐庫且先營一堂
開牕不糊紙種竹不依行意取北簷下牕與竹相當
透屋聲淅淅逼人色蒼蒼烟通杳靄氣月透玲瓏光
是時三伏天天氣熱如湯獨此竹牕下朝迴解衣裳
輕紗一幅巾小簟六尺牀無客盡日靜有風終夜涼
乃知前古人言事頗諳許清風北牕臥可以傲羲皇
同韓侍郎遊鄭家池吟詩小飲

野艇容三人晚池流浼浼悠然倚棹坐水思如江海
宿雨洗沙塵晴風蕩烟靄殘陽上竹樹枝葉生光彩
我本偶然來景物如相待白鷗驚不起綠芡行堪採
齒髮雖已衰性靈未云改逢詩遇杯酒尚有心情在

晚歸有感

朝弔李家孤暮問崔家疾時李十一侍御諸子尚
憂崔二十二貞外三年臥
回馬獨歸來低眉心鬱鬱平生所善者多不過六
七如何十年間零落三無一劉曾夢中見元向花前

失劉三十二校書歿後嘗夢見之漸老與誰遊春城

好風日

曲江感秋二首 并序

元和二年三年四年予每歲有曲江感秋詩凡三篇
編在第七集卷是時予為左拾遺翰林學士無何貶
江州司馬忠州刺史前年遷主客郎中知制誥未周
歲授中書舍人今遊曲江又值秋日風物不改人事
屢變况予中否後遇昔壯今衰慨然感懷復有此作
噫人生多故不知明年秋又何許也時二年七月十
日云耳

元和二年秋我年三十七長慶二年秋我年五十一
中間十四年六年居譴黜窮通與榮悴委運隨外物

遂師廬山遠重吊湘江宿夜聽竹枝愁秋看艷堆沒
近辭巴郡印又乘綸闈筆晚遇何足言白髮映朱紱
消沉昔意氣改換舊容質獨有曲江秋風烟如往日

一
踈蕪南岫草蕭颯西風樹秋到末幾時蟬聲又無數
莎平綠茸合蓮落青房露今日臨望時往年感秋處
池中水如舊城上山如故獨我髮間毛昔黑今垂素
榮名與壯齒相避如朝暮時命始欲來年顏已先夫
當春不歡樂臨老徒驚悞故作詠懷詩題於曲江路

翫松竹二首

龍蛇隱大澤麋鹿遊豐草栖鳳安於梧潛魚樂於藻
吾亦愛吾廬廬中樂吾道前松後修竹偃卧可終老

各附其所安不知他物好

二

坐愛前簷前臥愛北牕北牕竹多好風簷松有嘉色
幽懷一以合俗念隨緣息在爾雖無情於予即有得
乃知性相近不必動與植

衰病無趣因吟所懷

朝食多不飽衣臥常少睡自覺寢食間都無少年味
平生好詩酒今亦將捨棄酒唯下藥飲無復曾歡醉
詩多聽人吟自不題一字病姿與衰相日夜相繼至
况當尚少朝彌慙居近侍終當求一郡聚少漁樵費
合口便歸山不問人間事

逍遙詠

亦莫戀此身亦莫厭此身此身何足戀萬劫煩惱
此身何足厭一聚虛空塵無戀亦無厭始是逍遙人

白氏文集卷第十一



